

A. or.

3887





N^o. 2.

a

a

A. or.

3887

Ladi

<36626011830019

<36626011830019

Bayer. Staatsbibliothek

33

GVLISTAN O V LEMPIRE DES ROSES

*Composé par SADI, Prince des Poëtes Turcs
& Persans.*

Traduit en François par ANDRE' DV RYER,
sieur de Malezair, Gentil-homme ordinaire de la
Chambre du Roy, Cheualier de l'Ordre du S. Spul-
chre de Ierusalem cy-deuant Consul pour sa Majesté,
& ses nations en Alexandrie, au grand Caire, & Royau-
me d'Egypte.




A PARIS

Chez ANTHOINE DE SOMMAVILLE, en la petite
Salle du Palais, à l'Escu de France.

M. DC, XXXIV.

AVEC PRIVILEGE DV ROY

Duflais





A MONSIEVR MONSIEVR
HOTMAN,
SEIGNEVR DE MOR-
FONTAINE, ABBE' DE S. MARD,
Conseiller du Roy en sa Cour
de Parlement.



MONSIEVR,

*Le long-temps
que i'ay seruy le
Roy & ma patrie dans les pays
estrangez ma donné moyen d'ap-
à ij*

EPISTRE.

prendre leurs mœurs & coustumes , avec le langage des Turcs, Persans & Arabes. Fueilletant les Bibliothèques des plus curieux d'entr'eux en Egypte , au grand Caire & à Constantinople , i'ay rencontré que le liure intitulé *Gulistan*, c'est à dire l'Empire des Roses est fort prisé entr'eux pour la subtilité de ses responses , pour la solidité de son discours , douceur de sa poésie , & gravité de ses sentences. C'est ce qui m'a convié depuis mon retour d'employer quelques heures de mon loisir à sa version, l'habillant à la Françoisse , Et quoy que ie n'aye pas la politesse du langage ny la mignardise des paroles exquisés pour représenter sa

EPISTRE.

naïfueté, & qu'il soit assez difficile de donner à la prose la grace & l'ornement de ses vers : i'estime que ceux qui ont quelque affection aux langues Orientales, & qui sçauent combien il est difficile de les deguïser à nostre mode, n'en feront pas moins d'estat s'errestant plus tost au sens de l'Authheur qu'à la rudesse de mon discours. Cette consideration m'a obligé de vous l'offrir, m'assurant que si vous le daignez voir d'un œil favorable vous couurirez aisémēt par vōtre autorité tous les deffauts de son traducteur, puisque vos voyages ne vous ont pas seulement donné la connoissance de l'Italien & Espagnol, mais avec le Latin, Grec

EPISTRE.

Et Hebreu, vostre estude vous a
 acquis une parfaicte intelligence
 du Siriaque Et de l'Arabe, la der-
 niere desquelles n'est pas seulement
 semee dans tous les livres des peu-
 ples Orientaux, mais des quatre
 parts du monde, les trois s'en ser-
 vent Et en usent comme de leur
 langue ordinaire : Tellement que
 les Chrestiens qui y sont en grand
 nombre attendent avec impatience
 cette fameuse Bible, à laquelle
 travaille ce Genie des langues, le
 sieur Gabriel Sionite, lequel pu-
 blierà par tout vostre humanité Et
 rendra à la posterité vostre nom
 immortel pour la favorable retrai-
 te que vous luy avez donné dans
 vostre maison afin d'accomplir cét

*incomparable ouvrage qui passera
 en son espece tous ceux qui se sont
 iamaïs entrepris deuant & depuis
 le Christianisme. Octroyez donc ie
 vous supplie, Monsieur, vostre
 protection à cét eſtranger & trou-
 uez bon que le Gulistan se faſſe voir
 en France ſous vostre nom; il ne
 dira rien de ſa Religion qui puiſſe
 offencer les plus ſcrupuleux ny
 qui ſoit indigne de vostre azile.
 Je vous supplie le recevoir avec
 cette affection qui m'a rendu ſans
 fin.*

MONSIEUR,

Vostre tres-humble & tres-obeiſſant
 ſeruiteur, DV RYER
 DE MALEZAIR.



GVLISTAN,

COMPOSE' PAR SADI PRINCE
des Poëtes Persans.

PREFACE.



OVANGE soit à Dieu puissant & glorieux, l'obeissance à ses commandemens nous approche de sa divine Majesté, & estre dans la reconnoissance de ses bien-faits est vn accroissement de grace. La respiration prolonge la vie, &

A

l'homme est ressiouy par l'aspiratiō en l'vne & en l'autre : il s'y rencontre deux graces , & chaque grace merite vn particulier remerciement. Quelle est la langue qui s'en pourra dignement acquiter? Lignée de Daud ne sois ingrate puisque peu de mes creatures sont reconnoissantes. Il est bien seant à la creature de s'excuser sur ses defauts, puisque personne ne peut dignement exprimer les bien-faits de Dieu : la rosee de sa misericorde infinie est tombée sur tout le monde , & la table de ses graces s'estend par toute la terre. Il ne confond sa creature pour vn peché, & ne la priue de son pain quotidien pour vne faute. O liberal qui as soin de donner le pain quotidien aux heretiques & idolatres!

PREFACE.

3

abandonnerois tu tes amis, puisque tu as soin de tes ennemis? Les vents de l'Aurore ont esté commandez d'estédre son liét esmaillé de diuerfes couleurs, les nuées du Printemps de nourrir les plantes dans le sein de la terre, les arbres de se reuestir de leurs feuilles vertes, & les branches de se couvrir de leurs chapeaux de fleurs à l'arriuée du Printemps, par grace speciale de Dieu. Le verjus s'adoucit, & le noyau de la datte produit vn grand palmier, les nuages, le vent, la Lune, le Soleil, & le Ciel trauaillent à te faire auoir du pain, ne le mange pas ingrattement. Ces choses insensibles obeissent à ce qui leur est commandé pour l'amour de toy, tu seras sans raison, si tu nereconnois tant de faueurs.

A ij

Considere la bonté de Dieu , les hommes pechent , il détourne sa face de leurs pechez , & ceux qui approchent sa diuine Majesté, confessent qu'ils ne l'adorent pas assez dignement, & qu'ils ne connoissent parfaictement sa diuinité , que si quelqu'un demande quel est son estre , que peut répondre vne personne muette & ignorante. Vn homme facetieux ayant vn iour en cōpagnie plongé son esprit en cette matiere, & demeure long-téps songeart & pésif, estant reuenu à foy, interrogé par raillerie d'un sien amy, quel present il luy auoit apporté du iardin où il auoit esté, i'auois resolu, respondit-il , d'apporter le coin de ma robbe plein de roses pour mes amis, mais l'odeur m'a tellement

PREFACE.

5

rauy , que le coin de ma robe
m'est eschappé des mains. La cho-
se aymée cause souuent la mort à
celuy qui ayme, le papillon se brû-
le en l'amour de la chandelle, &
nous nous perdons en la recherche
de ce secret , les plus curieux en
sont les plus ignorants , & ceux
qui en ont appris quelque chose,
leur science n'a pas esté plus auant,
ils en ont parlé par parabole, par
exemple, par ouy dire, par lecture
& estude , & l'heure de leur mort
est arriuée auant qu'ils en ayent
peu acquerir vne simple connois-
sance, ainsi nous demeurons tou-
siours pour ce regard en mesme
estat d'ignorance ; La memoire
de Sadi est heureuse , puis qu'il
nous en laisse quelques enseigne-
mens, il est estimé en la bouche du

A iij.

peuple, & la voix de ses paroles est estenduë par toute la terre, ses enseignements ont esté trouué doux comme miel, & ses paroles ont esté receuës comme écrites en vn papier d'or, personne n'est arriué à la perfection de sa doctrine & eloquence. Ce grand Prince, le plus grand que le temps ayt fait paroistre, le Lieutenant de Salomon, ce grand Monarque victorieux, protecteur de la religion & des gens de bien, seigneur des terres & des mers Aboubakre, Bin Sad, Bin Zenki, Ombre de Dieu en terre, l'a regardé d'un œil d'affection, a estimé sa vertu, luy tesmoignant vne entierement bonne volonté, sans doute son amitié a conuié les grâds & les petits à l'aymer puisque le peuple embrasse la loy, & suit le

sentiment de son Prince.

Depuis le temps que tu m'as regardé de bon œil, mes vestiges ont esté plus lumineux que le Soleil encore que ie sois accompagné de tous les defauts du monde. Tous les deffauts qui plaisent au Roy sont tenus pour merite & perfections.

Vn iour estant au bain ie contray vne terre odoriferante qui y auoit esté apporté pour vn Seigneur de condition, ie demanday si c'estoit de lambre ou du musc, on me respondit que c'estoit vne terre ordinaire & commune, mais qu'elle auoit esté mise auprès de quelques fleurs qui luy auoit communiqué cet odeur. Ceux qui liront ce liure treuueront du profit & aduantage en ses

A iij

preceptes , & la vertu contenuë en iceluy leur sera communiquée.

Dieu Eternel enrichis les vrayz croyans & leur Prince Abobakre, augmente ses graces & bien-faits augmente sa grandeur, & le rends victorieux avec ses Ministres contre ses ennemis, conferue ses Estats, prolonge ses iours, & ceux de son fils, puisque par ta grace speciale le monde est heureux à cause de cet enfant.

Sçay-tu pourquoy i'ay sejourné si long-temps en pays estrange, ie suis fortý de mon pays pour ne voir la hôte & infamie des Turcs, qui par des dissentions ciuiles auoient rendu leurs Estats confus & embrouilleez comme les cheueux frisez d'un More, ils estoient hommes & se mangeoient com-

me des loups , à mon retour i'ay treuuvé ces Leopars auoir changez de nature, & iouir d'une paix & tranquillité assurée par la bonne iustice du Roy Abobakre , Bin Sad Bin Zenki. Le Royaume de Persene peut souffrir aucun dommage tant qu'il sera sous son ombre, sa Cour est vn lieu de contentement , & l'asyle des affligez. Grand Dieu Createur de l'Vniuers, donne à ce Prince des recompenses égales à ses merites, & garde ce Royaume de dissention, tant que la terre & les eaux subsisteront.

Ce qui m'a conuié de composer ce liure est qu'un iour repassant en moy-mesme les années passées, ie regrettay le temps que i'ay si inutilement employé, chaque mo-

ment nostre vie diminuë, & plus on pense au temps passé, mieux nous connoissons le peu qui nous reste de vie. Celuy-là doit estre honteux qui laisse le monde sans y auoir fait aucune bonne œuvre, & entend sonner à cheual auant que son équipage soit prest. Quelques vns ont basti des Palais qu'ils ont laissé au pouuoir d'autruy, & d'autres en ont commencé qu'ils ont laissez imparfaits. Mais puis-que telles choses ne sont de durée que nous sommes tous bons ou mauuais, heureux ou malheureux. Ceux-là sont les plus aduisez & les plus heureux qui s'addonnent à bien faire, & laissent sur leur tombeau des armes pour deffendre leur vie & leur memoire, personne n'y en laissera apres toy, il faut

que tu y pouruoye promptement, cependant que tu es en santé, puis-que l'aage est comme la neige qui fond au Soleil, si tu vas au marché sans argent- ie crains que tu n'en reuienne les mains vuides, & si tu mange ton bled en herbe tu ne moissonneras que des festus & de l'iuroye. Apres ces considerations ie fis resolution de me retirer en lieu solitaire pour me deliurer de l'importunité des compagnies, & m'abstenir des paroles vaines & inutiles qui y sont ordinairement en vsage. Les sourds & les muets cachez en quelque coin sont plus heureux que ceux qui sont és Cours des Roys, & ne peuuent reprimer leur langue. En ce temps vn de mes anciens amis me vint voir, lequel comme autrefois commença

de m'entretenir de propos de raillerie, ie luy fis connoistre par mon silence la resolution que i'auois prise de viure comme muet en solitude le reste de mes iours, il protesta qu'il ne m'abandonneroit iamais si ie ne viuois & discourrois avec luy seló nostre premiere coutume, que c'estoit trop mal traiter vn ancien amy, & que quand i'auois iuré de luy deplaire, la satisfaction d'un tel serment deuoit estre legere, puisque c'est chose irraisonnable & contraire au sentiment des gens de bien de fâcher tous les amis par vn eternal silence que la langue en la bouche d'un homme est la clef d'un thresor, si la porte est fermee on ne scaits'il est de pierres precieuses ou de cailloux. Que bien que ce soit

quelquefois ciuilité de se taire en la presence des sages , c'est sottise de se taire où il faut parler. Deux choses tesmoignent le trouble de l'esprit d'un homme , le silence lors que le parler est requis , & le parler lors qu'il faut garder le silence. Gagné par ses discours & par nostre ancienne amitié, ie m'en allay discourant avec luy dans vn iardin où le rossignol estudioit sa musique , & où mille sortes d'oiseaux chantoient à l'enuy l'un de l'autre, il estoit esmaillé des plus belles & plus rares fleurs du monde, & ses arbres couuerts de toutes sortes de bons & beaux fruiçts, murmuroient doucement au souffle des zephirs qui le rafraichissoient , la terre y ressembloit au liçt que le brodeur Bocolmon pre-

senta à Salomon , rendant vn odeur extremement suauue, causée par l'abondance & diuersité des fleurs : bref c'estoit vn lieu si plein de delices que rien n'y estoit facheux que la pensee d'en sortir ; ce mien amy y ayant cueilly vn bouquet de fleurs, pour emporter, ie luy parlay de la sorte, les roses & les fleurs sont bientost fanées, & le plaisir que nous en receuons finist aussi tost qu'elles sont fecties, il faut s'attacher à ce qui est solide & permanant, ie veux composer vn liure intitulé Gulistan, qui signifie le Royaume des roses, il defiera les iniures du temps avec le changement des saisons, & ne changeroit pas ses fleurs aux plus rares fructs de l'Automne. Alors le maistre du iardin s'attachant au

pan de ma robbe me coniura de telle sorte d'accomplir ce que ie luy faisois esperer que mon liure fust paracheué auant que les roses fussent tout à fait fletries.

Et d'autant que c'est chose difficile de parler si bien que quelques vns n'y treuuent à redire, & qu'une bonne partie de ceux qui nous escoutét sont aux aguets plustost pour cōtroller nos parolles & actiōs, que pour apprēdre: Je cōiure ceux qui liront ce liure de ne se pas arrester à ce qui sera contraire à leur humeur. Les Ambassadeurs des Indes après auoir traité de plusieurs grandes & importantes affaires avec Burgemzer, dirent qu'ils n'auoient remarqué aucun deffaut en luy, sinon qu'il parloit trop lentement & estoit trop tar-

dis en ses responses , ce qu'ayant
esté entendu par luy , il repartit
qu'il estoit plus feant de penser à
ce qu'on vouloit dire, que de se re-
pentir de ce qu'on auoit dit. Ce-
luy qui parle bien encore qu'il soit
tardif à parler n'a pas sujet des'en
repentir, & les bestes sont prefe-
rables à celuy qui parle sans raison,
principalement en la presence des
Roys & sçauants personnages.
Neantmoins encore qu'on ne doi-
ue vendre lambre faux au mar-
ché des perles , que la chandelle
n'aye point de rayons auprès du
Soleil , & que les Clochers paroif-
sent petits au pied des hautes mon-
tagnes : ie ne m'estimeray pas peu
disert & eloquent si le present de
ce liure est agreable à ce grand
Monarque Abobakre : car bien
que les

que les ennemis s'efforcent de rabatre l'orgueil de ceux qui se glorifient de leur science. J'espère que mon humilité servira de bouclier à mon ignorance, puisque ce n'est pas le faict d'un cœur genereux d'outrager ceux qui s'humilient.

Locman interrogé de qui il avoit appris la prudence, respondit qu'il l'auoit apprise des aveugles qui ne se laissoient iamaïs aller d'un pied, sans estre assurez de l'autre, pense donc comme tu sortiras d'un lieu avant que d'y entrer, connois & esprouve tes forces, puis espouse vne ieune fille ou vne femme veuve, le cocq quoy que genereux, est inutile en la guerre des leopards, le courageux leopard ne peut rien en la guerre des faulcons & Autours;


B

toutes fois les deffauts de celuy duquel la foiblesse est appuyee des Grands , sont couuerts par leur adueu & autorité : c'est ce qui m'a meü de mettre ce liure en lumiere, sous l'ombre & protection de ce grand Prince Aboubakre, pour laisser quelque memoire d'auoir esté, & conuier ceux qui le liront d'auoir souuenance de moy en leur prieres. Et afin de le rendre moins ennuyeux ie l'ay diuisé briefuement en huit Chapitres. Chapitre premier des mœurs des Roys. Chapitre 2. de l'humeur des Religieux Dreuis. Chap. 3. du contentement. Chapitre 4. de l'vtilité du silence. Chap. 5. de l'Amour. Chap. 6. de l'infirmité de la vieillesse. Chap. 7. de la nourriture & instruction. Chapitre

PREFACE. 19

huitième des Prouerbes. En
l'année six cens cinquante six de
l'Hegire de Mahomet.

B ij



DES MOEVRS DES ROYS.

CHAPITRE I.

I'A y ouy dire qu'un Roy commanda vn iour de faire mourir vn sien sujet qui estoit innocent, lequel se voyant priué d'esperoir, de salut & de vie, se print à dire des iniures à son Prince. (Vn desesperé dit tout ce qui luy vient à la bouche, le desef-

B iij

poir augmenta la hardiesse de parler, vn chat acculé se ruë contre les chiens, & la necessité nous fait empoigner vne espee tranchante.)

Le Roy demanda à vn de ses Ministres ce qu'il auoit dit, Grand Prince, respondit-il, il dit que Dieu pardonne à ceux qui dominent leur cholere, & qui ont pitié du peuple. Cette responce agrea tellement à ce Prince qu'il fit grace à ce pauvre miserable. Alors vn autre Ministre ennemy & ennemy du premier, parla en cette façon, il n'est permis à ceux de nostre nation de mentir en presence du Roy, cet homme a proferé des paroles & dit des injures à sa hautesse qui meritent chastiment. A ce discours le Roy fronça le front, & parla de la

forte , Le mensonge de celuy-là m'est beaucoup plus agreable que ta verité , son mensonge est suiuy du bien , & ta verité est suiuiue du mal ; vn mensonge profitable & pacifique est meilleur qu'une verité nuisible & pernicieuse. Malheur arriue à celuy auquel le Roy a creances il parle mal, il doit toujours auoir le bien en la bouche. Le Roy Feridon auoit fait escrire sur le portail de son Palais, personne , ô mon frere, n'est permanent en ce monde ; ne te fie qu'en Dieu, ne mets ton appuy au monde ny au Roy, ils en ont esleué plusieurs comme toy, qu'ils ont fait estrangler. Lors qu'un franc & genereux courage est resolu de sortir du monde , quelle difference fait-il de mourir dans un trahison

ou sur la poussiere de la terre.

Vn Roy de Corasan, vid vne nuit en songe Sultan Mamoud Sebectin, cent ans apres sa mort, qui auoit les yeux tournez contre son Palais. Tous les Docteurs de ce temps ne peurent expliquer ce songe hormis vn pauvre Religieux Dreuis, lequel dit que ce Roy son predecesseur, regardoit comme ses Estats changeoient de Maistre, & tomboient sous le pouuoir d'autrui, à cause de son iniustice. Combien y a-t'il de personnes de condition enseuelis sous terre, desquels on n'a aucune memoire, ny autre marque d'auoir esté, que des os mangez de la poussiere. Mais le souuenir du iuste Nacherouan n'est pas esteint, encore qu'il y ait long-temps qu'il

ne soit plus, il faut bien faire pendant qu'on est en vie, & croire que ce que nous viuons est autant de gagné, auant que ceste voix s'entende & qu'on die, Vn tel n'est plus.

I'ay ouy dire qu'un Roy de Perse auoit vn fils de petite taille & mesprisé de plusieurs, à cause de la disproportion de son corps, neantmoins ses autres enfans estoient grands, bien-faits & de bonne grace, le Roy le regardant vn iour d'un œil de mespris & de compassion, il reconnut au visage de son pere & à son maintien, le peu d'estat qu'il faisoit de luy, & luy parla en ceste sorte, Mon pere, vn petit homme sage vaut mieux qu'un grand fol, les choses les plus grosses ne sont pas tousiours celles qui sont

de grand prix, on mäge la chair du mouton, & l'Elephant sert de charongne : Dieu a preferé le petit mont Mont de Sion : aux grandes montaignes , vn cheual maigre vaut mieux qu'un asne gras. Le Roy se print à rire de ce discours, & les Seigneurs qui estoient presents louierent son esprit & son iugemēt, ce qui dépleut grandement à ses freres. Vn homme en parlant fait connoistre ses deffauts & son merite, & celuy qui se tait cache l'un & l'autre : vn petit boccage n'est pas tousiours vuide de gibier, le leopart y peut estre endormy. En ce temps le Roy fut attaqué, & furieusement assailly par les Princes ses voisins, les deux armées estant en presence , ce petit fils contre-fait fut le premier qui poussa son

cheual contre les ennemis, disant, Je ne feray pas de ceux qui mon-
streront le dos au iour de la batail-
le, on me verra au iourd'huy cou-
uert de sang & de poussiere: celuy
qui combat genereusement ha-
zarde sa personne, mais celuy qui
s'enfuit hazarde ses compagnons,
& les iouë. Il donna sur l'escadron
plus aduancé si rudement que les
soldats espouuantez au commen-
cement du grand nombre de leurs
ennemis, puis apres animez par son
courage & par sa valeur allerent
tous serrez à la charge & méprisant
toutes sortes de dangers qui se pre-
sentoient deuant leurs yeux, mirent
tous leurs ennemis en déroute. A-
pres la bataille, il vint saluer son
pere, & luy dit, Mon pere, mon
corps vous semble ridicule & con-

trefait, ne mefurez ma valeur à ma taille, vn cheual maigre est plus vtile au iour de bataille qu'un bœuf gras. Son pere ayant reconnu sa vaillance & adresse l'embrassa avec affection, luy baïsa les yeux, & luy donna la Lieutenance generale en tous ses Estats, ce qui excita contre luy l'enuie & la haine de ses freres, lesquels conspirant sa perte empoisonnerent sa viande pour le faire mourir dequoy ayant eu aduis par vne sienne sœur, il se leua de table sans manger, proferant ces paroles, Nous sommes en la faïson que les honnestes gens meurent, & que ceux qui sont sans honneur prennent leur place, neantmoins personne ne se met à couuert sous les aïles des hiboux, quelà où il n'y a point d'oiseaux de Paradis, le

Roy ayant appris cette conspiration en fut fort indigné contre ses autres enfans, & pour les tenir tous en bonne intelligence il partagea ses Estats entr'eux si heureusement qu'ils furent tous contents, euitant par ce moyen toute sorte de haine & rancune entre ses heritiers. Dix pauvres Religieux Dreuis, peuuent coucher sous vn mesme toit, mais deux Roys ne peuuent demeurer dans vn seul Royaume, vn homme de bien donne volontiers la moitié de son pain aux pauvres, mais vn Roy fait tousiours dessein sur les Estats de son voisin.

Vne troupe de voleurs Arabes s'estant vn iour retirez, & fortifiez sur le haut d'vne montaigne, auoient deserté les chemins & passages, & par leurs voleries & bri-

gandages , s'estoient rendus redoutables aux habitans du pays, les gens du Roy commis à la garde des chemins ayant esté par eux battus & mal traittez obligerent les principaux Ministres du Prince de s'assembler pour aduiser entr'eux des moyens de deliurer le peuple de cette oppression , apprehendant ne les pouuoir chasser de leurs retranchements, s'ils s'y fortifioient dauantage. Vn arbre nouuellement planté s'arrache facilement, lors qu'il a pris racine, on ne le peut esbranler, on peut à la source d'vne riuiera arrester l'eau avec vn peu de terre, quand elle est débordée on a peine de la passer avec vn Elephant. La resolution de l'assemblée fut , qu'on commettrait vn homme pour aller avec ruse & in-

duſtrie reconnoiſtre en quel eſtat eſtoient ces voleurs, & eſpier l'occafion de les attaquer avec aduantage, à cet eſſect pluſieurs perſonnes ſ'embuſcherent dans le bois & aux aduenues de la montagne, cependant qu'une partie de ces brigands eſtoient allez à la picorée, lesquels ſ'eſtans retirez de nuict avec leur butin furent au premier ſommeil attaquez de tous coſtez par ceux qui eſtoient en embuſcade, qui les ayans pris les lierent les mains derriere le dos & les amenerent en la preſence du Roy, qui commanda de les faire tous mourir. Alors vn des Viſirs voyant entr'eux vn ieune enfant, beau & de bonne grace, baiſa le pied du throſne Royal, & parla au Roy de cette ſorte. Grand & genereux Prince, ce ieun-

ne enfât n'a encor gousté du fruiêt de la vigne de vie, il ne sçait que vaut le fruiêt de la ieunesse, ie supplie tres-humblement ta hauteſſe de luy faire grace, ce ſera vne particuliere obligation que ton eſclave receura de ta clemēce, celuy, reſpondit le Roy, ne deuiendra iamais bon qui eſt méchant de nature, il eſt meilleur d'en couper le tronc & extirper les racines, tuer le ſerpent & laiſſer viure les ſerpenteaux ce n'eſt le faiêt d'un homme ſage la frequentatiō des meſchāts nous rend meſchās cōme eux. Puisſant Prince replica le Vizir, Ce que dit ta hauteſſe eſt tres-veritable, mais ce ieune enfant n'a pas eſté long-temps avec ces brigands, & n'eſt encore imbu de leurs vices & meſchancetez, j'eſpere qu'eſtant nourry

nourry parmy les gens de bien, il fera homme de bien, il est à peine fort de l'enfance & ne peut estre endurcy d'as le mal avec ces voleurs, nous naissons tous gens de bien, nos parents nous donnent telle instruction que bon leur semble, nous sommes Turcs, Juifs, Chrestiens & idolatres avant que nous ayons l'usage de raison. Il luy pardonne, respondit le Roy, contre mon deuoir & mon inclination, il ne faut iamais estimer les meschâts foibles, vn fleuve se passe facilement à sa source; mais en estant esloigné il entraine les mulets & les chameaux avec leurs charges. Neantmoins le Vizir ayant obtenu la grace de ce ieune enfant le donna à vn Precepteur pour l'instruire, où il se rendit agreable à vn chacun

C

& profita tellement à l'estude des bonnes lettres, que le Vizir ne se pût empescher de louer son bon naturel en presence du Roy, lequel souffriant, luy dist, le fils d'un loup sera toujours loup, encore qu'il soit nourry entre les hommes; quelques années apres, vne troupe de rebelles l'éleut pour chef, & liant vne estroite amitié avec luy, conspira la mort du Vizir & de deux enfans qu'il auoit & les assassinerent avec leur pere, saccagerent son Palais, emporterent toutes ses richesses & se retirerent dans les forts & retranchements des voleurs, exercerent toute sorte d'hostilité & de rebellion, dont le Roy ayant eu aduis se mordit le doigt, disant qu'on ne pouuoit faire vne bonne lame d'un mau-

uais fer, la nourriture ne rendra jamais humain celuy qui est brutal de nature, les fleurs croissent dans les bonnes terres, & les chardons dans les mauuaises, il ne faut employer en vain son trauail & sa peine, faire bien aux meschants, est autant dangereux que de faire mal aux bons.

I'ay veu à la porte du Palais vn ieune Gentilhomme tout exploré, qui est estimé vn des plus sages & vertueux de nostre siecle, ses vertus ne se peuuent exprimer par aucuns discours, dès son enfance on voyoit sur son front les marques certaines d'vne future grandeur, on voyoit briller sur sa teste vne grande estoile de sagesse & de prudence, sa beauté & son sçauoir le rendirent tres-aggreable & tres-

puissant auprès du Roy: Les sages disent qu'il faut acquérir l'honneur & l'autorité par merite & nō pas par argent, l'esprit rend l'homme vieil, & non pas les annees. Vn iour ses voisins enuieux de sa prosperité l'accuserent d'un tres-enorme crime, & employerent toutes leurs forces & industrie pour le faire perir, mais que peuuent faire les ennemis contre ceux qui ont des amis puissants & fauorables? Le Roy qui auoit de la bonne volonté pour luy, luy demanda vn iour d'où prouenoit la haine & rancune de ses voisins. Grand & puissant Monarque, respondit-il, à l'ombrage de ta hauteſſe i'ay rendu vn chacun content, hormis les enuieux, qui ne peuuent receuoir plaisir que dans ma ruine, que peut-

on faire pour contenter les enuieux qui sont vn tourment eternal à eux-mesmes les meschants & malheureux souhaitent avec passion la perte de ceux que la fortune regarde de b^o œil, & ne peuuent supporter l'éclat de la prosperité des bons ; Si la chauue-soury ne peut regarder le Soleil , ce n'est pas la faute de ce bel Astre, il vaut mieux que mille semblables yeux ne voyent goutte , que si le Soleil estoit noir.

Vn tyran Roy de Perse rauissant le bien de ses sujets & exerçât sur eux toute sorte d'iniustice, contraignit le peuple de quitter le lieu de sa naissance pour aller chercher vn abry en pays estrange ; le Royaume de Perse deuint sterile & desert, & le reuenu du Prince fut

grandement alteré par faute de gens pour cultiuer la terre , en mesme temps il fut attaqué de tous costez par ses ennemis, qui luy firent vne tres-rude guerre. Les sages disent que celuy qui crie au secours en son affliction, doit auoir acquis du support en temps de prosperité. Vn valet mal traité s'enfuit, & les hommes lettrez sont rendus esclaués par la courtoisie. Vn iour ce tyran faisant lire en sa presence vn liure d'histoire contenant la perte des Estats du Roy Duhac , & l'euenement de Feridon , à la Royauté , son Vizir luy parla en cette façon, Feridon n'auoit ny ville, ny thresor, ny soldats, ny chasteau, comment a-t'il estably sa Royauté, c'est comme tu l'as ouïy, respondit le Roy, vne partie

du peuple se ietta auprès de luy qui l'aïda à se faire Roy. Puisque la Royauté s'acquiert, dit le Vizir, par l'assistance du peuple, pourquoy chasse tu tes sujets hors de tes Estats par ta violence, il est meilleur de nourrir l'affection des peuples que des gens de guerre pour regner par force & violence, il faut qu'un Roy soit de bonnaire & qu'il garde ses sujets d'oppression, mais tu n'as aucune de ses choses, il n'y a point Royauté dans l'iniustice: un loup ne peut estre Pasteur, le Roy qui sème la graine d'iniustice sappe les fondemens de ses Estats, & ressemble aux hiboux qui n'ayment que les ruines. Ce discours desplut à ce tyran, lequel outré de colere fit trancher la teste à son Vizir, quelques iours apres les cousins ger-

maines de ce Roy se souleuerent contre luy & demanderent la part & portion que leur pere auoit dans le Royaume, les peuples qui auoient fui à cause de sa tyrannie se ioignirent à eux, & combatirent si opiniastrement qu'ils le chasserent de ses Estats, & establirent ses cousins en sa place. Vn Roy qui permet l'injustice sous-main, semble aimer ses ennemis, fais la paix avec tes sujets, & tu feras à couuert contre l'effort de tes ennemis: à vn Roy iuste tout le peuple est soldat.

Vn Roy de Perse estoit dans vn Nauire, auquel se rencontra vn ieune page, qui n'ayant iamais esté sur mer, pleuroit incessamment, & sembloit de peur de faire naufrage, on ne le pouuoit assseurer par aucun discours, le bruit qu'il faisoit

déplaisoit au Roy & à ses Courtisans, sans qu'ó y pût treuver aucun remede que par le moyen d'un Medecin qui estoit dás le vaisseau, lequel dit qu'il feroit taire ce garçon si on luy commandoit, de quoy estant prié, il ordonna de ietter ce pleureux dans la mer, & apres l'auoir fait plonger trois ou quatre fois dans l'eau il le fit prendre par les cheueux & apporter au bord du Nauire, auquel il s'attacha avec les mains, & estant monté sur le coridol se mit en vn coing sans dire mot. Le Roy demanda quelle science il y auoit en cela, Sage Monarque, respondit le Medecin, cet enfant n'a iamais veu noyer personne en la mer, & ne connoissoit pas ce que vaut le salut du vaisseau, de mesme que celuy ne sçait

pas ce que vaut la prospérité qui n'a iamais esté en aduersité, celuy qui a le ventre plein ne veut point de pain d'orge, c'est ce que desire ceux qui ont faim: ceux qui sont en Purgatoire croyent estre en Enfer, & ceux qui sont en Enfer estiment le Purgatoire vn Paradis.

Vn Roy Arabe malade de vieillesse, & desesperé d'une plus longue vie, vit à l'impourueu entrer vn courrier dans son Palais qui luy apportoit nouuelle de la prise d'un Chasteau de la defroute de ses ennemis & comme le peuple obeissoit à ses commandemens, Cette nouuelle, respondit-il, ne s'adresse pas à moy, elle s'adresse à mes ennemis, c'est à dire, à mes heritiers, j'auois esperance de prendre ce Chasteau, il m'est arriué ce que j'esperois, mais quel auantage

en reçoÿ-ie, puis que ie ne puis voir les iours qui sont passez, mon heu-
re s'approche, la volonté de mes ennemis est accomplie en moy, ils en ont ce qu'ils desirent, à la fin mes amis, vous passerez aussi, i'ay passé ma vie avec negligence, prenez mieux garde à vous que ie n'ay pris garde à moy.

I'estois vn iour assis sur le Tombeau de S. Iean au Temple de Damas, lors qu'un riche Prince Arabe renommé & reconnu par son iniustice, vint visiter ce lieu, & par sa priere demanda à ce Saint aide & secours contre ses ennemis, alors vn pauvre Religieux Dreuis qui estoit à la porte luy parla de la sorte. Ceux qui sont les plus riches sont quelquefois les plus necessiteux, aÿe pitié de ton peuple, & tu

n'auras peur de tes ennemis, celui qui est impitoyable a peur s'il tombe que personne ne luy tende la main, les hommes sont membres les vns des autres, & créez tous de mesme matiere, si vn membre est affligé les autres s'en resentent: Celuy qui n'est touché du mal d'autrui ne merite d'estre appelle homme.

Vn Roy tyran demanda à vn Sage quel estoit le temps le plus propre pour employer à l'oraison, il est bon pour toy, respondit-il, que tu dorme iusques à midy, afin que ton peuple soit en repos le matin, il est bon qu'un tyran ne se reveille iamais, il seroit meilleur qu'il mourust que de mal traiter son peuple.

J'ay ouï dire qu'un Roy dor-

moit tout le iour, & passoit la nuit en desbauche perpetuelle, disant souuentefois qu'il n'auoit meilleur temps au monde que lors qu'il estoit yure, parce qu'il ne songeoit alors ny en bié ny en mal, & n'estoit pas capable de res sentir aucuns mescontentemens ny ennuy.

Vn gueux couché tout nud au milieu du chemin, exposé à la rigueur du froid, entendant ce discours, luy dit qu'il estoit en cela égal à luy, parce qu'il estoit sans soucy, ce qui plût tellement au Roy qu'il luy ietta mille pieces d'argent, & luy enuoya des habits pour se couvrir contre l'iniure du temps, ce miserable mangea cet argent en peu de téps, & retourna à la Cour autant gueux & necessiteux qu'il estoit auparauant. L'argent ne

peut demeurer en la main des queſ-
ments, la paſcience en l'eſprit des
amoureux, ny l'eau dans vn cri-
ble. Les Princes ſe faſchent quand
on leur demande, celui ne meri-
te les bien-faits des Grands qui ne
les ſçait conſeruer au beſoin. Le
Roy ayant appris le retour de ce
gueux, commanda de le chaffer,
d'autant qu'en ſi peu de temps il a-
uoit mangé tant de bien, diſant,
Que celui eſtoit fol qui allumoit
ſa lampe en plein midy, parce
qu'il n'auroit plus d'huile pour la
nuict. Il eſt vray grand & gene-
reux Monarque (repartit l'un de
ſes Miniſtres preſent) mais il faut
donner aux pauvres ce qui leur eſt
neceſſaire avec moderation, afin
qu'ils ne le dépenſent tout à coup,
& non pas les chaffer avec colere

& indignation, vn Roy ne doit pas contenter les hommes d'esperance & courtoisie, pour les rendre apres malades par desespoir, vn Prince ne peut empescher qu'on ne luy demande, il faut qu'il vse de liberalité s'il veut estre aimé & fuiuy : car personne ne s'arreste dans les deserts d'Arabie, où il n'y a que de l'eau sale, les hommes les oiseaux & toutes sortes d'animaux s'arrestent à l'eau douce.

Vn Roy grandement rigoureux à son peuple, & auaricieux à ses soldats, estant vn iour assailly par ses ennemis, les gens prirent la fuitte si tost que les deux armées furent en presence. Les soldats espargnent leur sang lors qu'on leur espargne l'atgent:) Interrogez depuis de la cause de leur fuitte, &

blasmez d'auoir abandonné lâchement leur Prince , ils respondirent que leurs cheuaux estoient à l'escurie sans foin & sans auoine, & leur famille en necessité. Vn Roy qui est auaricieux enuers les gens de guerre, n'est seruy avec affection, l'argent qu'on leur donne est le prix de leur vie , il n'est pas raisonnable qu'ils soient en necessité , les braues hommes bien repeus vont genereusement à la charge, & ceux qui ont le ventre vuide combattent en fuyant.

Vn Vizir priué de sa charge par l'indignation de son Prince , se retira dans vn Conuent de Religieux pour passer ses iours avec eux, quelque temps apres sa fidelité estant connue au Roy, il le fit appeller pour le reestablr en son premier

premier employ, ce qu'il refusa, disant qu'il auoit appris que les Sages estiment plus le repos que l'employ des grandes charges. Ceux qui sont retirez en vn petit recoin avec sante sont deliurez des dents des chiens & du reproche des hommes,) le Roi lui repondit, qu'en quelque façon que ce fust, il luy falloit treuuer vn homme parfaictement sage pour gouverner ses Estats. Grád Roi, dit alors le Vizir, Celui qui fera parfaictement sage ne s'ingerera en telles affaires.

Siacos, interrogé pourquoy il se rendoit si complaisant à vn grand Seigneur, il respondit qu'il viuoit de les bien-faits, & que sous sa protection il estoit à couuert contre la malice & les efforts de ses en-

D

nemis. Puisque tu es sous sa protection, repliquerent-ils, pourquoy ne t'en approche tu pas de plus près pour paroistre avec splendeur dans le monde, & estre au nombre de ses fauoris. Je ne suis, dit-il, assuré que sa bõne volonté soit de durée, & crains le changement : Celuy qui a brulé cent ans durant des holocaustes deuant vn Idole se brule, s'il tombe vn moment dans le feu, les fauoris des Rois sont bien souuent le matin vestus de drap d'or & d'argent, & le soir ont la teste trenchée ; Il faut considerer le naturel des Princes, quelquefois on les faschent en les saluant, & quelquefois ils font du bien à ceux qui les iniurient. On dit qu'il est honorable aux fauoris des Rois d'estre splendides, mais c'est vne honte

aux sages; il faut chercher son contentement en soy-mesme, & laisser la splendeur aux fauoris.

Vn de mes compaignons me faisoit vn iour ses plaintes de ce qu'il estoit pauvre & necessiteux, chargé d'une grande famille & nōbre d'enfans, qu'il faisoit quelquefois resolution d'aller en pays estrange afin que personne ne sçeut en quelle façon il viuroit, & n'eust cōnoissance du bien & du mal qui lui arriueroit, il y a nombre de personnes de condition en necessité qui est inconneu, & plusieurs grands personnages ont eul'ame sur les leures qui n'ont esté plaints de personne. I'apprehende seulement, disoit-il, qu'on blasme ma resolution à cause de ma famille qui est necessiteuse, & crains qu'en seruant les

Grádsi enepuisse dóner aux miens le soulagement neccessaire; s'il y auoit vne recompense certaine pour ceux qui seruent bien les Princes, persóne ne pouroit assez loüer vne telle grace. Mó frere, luy respondis-je, le seruice des Rois a deux buts l'esperance du profit, & la crainte de la mort, Ce n'est l'aduis des Sages de tóber dans la crainte de la mort pour conseruer l'esperance du profit, personne ne demande à vn pauvre Religieux Dreuis le tribut desó champ ny celui de sa vigne, Contentte toy d'estre tourmenté ou cesse de seruir les Grands. Ce discours, répondit-il, n'est pas ce que ie te demande, ny selon mon intentió, les Sages disent que celui qui trame vne trahison tremble en rendant compte de ses actions, mais

le bien-faire nous fait aimer de Dieu, & n'ay veu personne qui se soit perdu dans le droit chemin. Quatre sortes de personnes ont peur de quatre autres, les voleurs du Preuost, les larrons des gardes, les méchants, des espions, & les garces de la Police, mais ceux qui ont leur compte net, n'apprehendent de le rendre, on frappe sur la pierre les linges sales pour les laver, mais la conscience nette est sans apprehension : l'histoire du renard, luy dis-je alors, ressemble à l'estat auquel tu te treuve à present. On le vit vn iour qu'il fuyoit tout effarouché, interrogé de la cause de sa peur, il répondit qu'il auoit oui dire qu'on prenoit tous les mulets & chameaux, pour porter l'équipage du Roy qui alloit à la guerre, ô fol & igno-

rant, lui dit-on, qu'as-tu affaire avec les mulets & les chameaux en quoy les ressembles tu, tay toy, répondit-il, si quelque enuieux vient, & dit, voila vn chameau, prenons-le, qui me viendra deliurer, & qui aura soin de moy? ie feray chargé auant que mes raisons soient entendües, les ennemis sont tousiours en embûche, & si tu cõtreuiens à la volonté du Roy, qui aura la hardiesse de parler pour toy. Ie treuve bon que tu demeure en ta maison, & que tu quittes l'ambitiõ, il y a de grãds profits à la mer, mais celui qui aime son salut se doit tenir au riuage. Ce discours neluy plut pas, & dit avec colere, quel iugement & quel esprit est-cela, les Sages disent quel amy aide son amy iusques dans la prison & dans

les fers , & que tous les ennemis paroissent amis à la table , i'appelle amy , dit-il , celui qui tend la main à son amy en son oppression. Je connu à son discours quelque alteration & mescontentement de ce que ie luy auois dit , pour le contenter i'allay en mesme temps treuuer vn de mes anciens amis qui estoit du Conseil d'Estat , lequel à ma priere lui donna vn petit employ , auquel il s'entretint quelque temps , & fit paroistre l'adresse de son esprit , ses conseils furent approuuez , & sa bonne fortune s'accrut de iour en iour , de telle façon qu'il fut vn de ceux qui approchoient de plus près la personne du Roy , qui auoit toute creance en lui , dont ie me réjouis grandement , & dis en moy-mesme , qu'il ne se faut

D iij

affliger dans le malheur , que la patience qui est amere à des fruicts doux & fauoureux. En ce temps ie fis resolution d'aller faire le pelerinage de la Meque, où ie sejourney deux ans, à mon retour il vint deux iournées au deuant de moy , ie le vis melencholique & affligé, vestu comme vn pauvre Dreuis , lors ie luy demanday l'estat de sa santé & de sa fortune : elle est telle, répondit-il, que tu me l'auois predit : Mes enuieux m'ont accusé de trahison , le Roy ne s'est voulu esclaircir de la verité , mes anciens amis sont demeurez muets, & ont oublié leur ancienne affectio. Chacun tasche de mettre le pied sur la gorge à celui qui est décheu de la grace du Roy , & s'humilie deuant ceux qui sont en faueur, i'ay souf-

fert mille desplaisirs , essuyé mille malheurs , le Roy a confisqué mon patrimoine, & tous mes biens & n'ay long-temps y a , senty aucun contentement que celui de ton heureux retour. Son affliction me toucha au cœur & cru qu'il n'estoit besoin descorcher ses playes pour mettre du sel dessus , neantmoins ie lui parlay comme s'ensuit , Tu recens les effects du mespris de mes conseils , le service des Rois est semblable au voyage d'outre-mer, on en reuient riche ou l'on perist dans les ondes, tu te verras bien tost les fers aux pieds, si tu mesprise de recevoir conseil , quitte le service des Grands & prend vn autre chemin & ne mets le doigt sur le scorpion, si tu n'as la force de supporter sa picqueure & son venin.

Vn Seigneur de condition assigna vn iour vne pension & entretenement annuel à quelques personnes de merite , vn d'iceux qui estoit mon amy se redit Religieux Dreuis , & quelques iours apres par sa mauuaise conduite sorty du Couuent & changea d'habits : cette legereté fut cause que son entretenement lui fut entieremēt retrenché. Nostre ancienne amitié m'obligea de m'employer pour son reſtabliſſement, eſtant allé pour cet eſſect au logis de ce Seigneur , les portiers me refuſerent rudement l'entrée de ſon Palais, ce que ie ſupportay facilement avec patience, parce qu'il ne ſe faut arreſter à la porte des grâds, ſi on n'y eſt apellé, les chiens mordent ſouuent les Eſtrangers. Quelques-vns des do-

mestiques de ce Seigneur , & qui approchoient sa personne de plus près , me voyant ainsi traité , accoururent à moy , & me receurent avec mil faueurs & courtoisie , leur maistre me rendit aussi de grands honneurs , & ayant pris occasion de l'entretenir de la disgrâce de mô amy , ie lui parlay en cette façon , Quel manquement auez vous veu en vostre pauvre seruiteur , auquel vous auez cy-deuant tant faits de bien ? Pourquoy est-il décheu de vos bonnes graces & priué de vos bien-faits. Dieu tout misericordieux voit le peché de l'homme & ne le priue de son pain quotidien , il lui maintient le moyen de viure. Ce discours fut agreable à ce Seigneur , il commanda en mesme temps de restablir mon amy en

son premier estat , & lui fit payer les sommes encourruës de son entretenement. Alors le remerciant de sa courtoisie & bié-fait, & m'excusant de l'ennuy que ie lui auois donné , ie luy baïsay les mains & luy dis, On fait des pelerinages aux lieux où sont les pardons , il faut que tu supports quelquefois nos importunités, personne ne ruë des pierres contre vn arbre sans fruit.

Vn Roy laissa apres sa mort de grands thresors à vn sien fils qui les distribua tous aux peuples & aux gës de guerre, disant souuent qu'on ne reçoit point de contentement du bois d'aloës , s'il n'est sur les charbons d'autant qu'il le faut perdre en le bruslant , pour en auoir l'odeur qui est agreable comme celle de l'ambre , il faut pareille-

mét que les Rois foient liberaux s'ils
veulēt estre aimez & seruis, il faut
semer pour recullir. Vn deses mini-
stres voyāt les profusions, lui parla
de la sorte, tes predecesseurs ont grā-
dement trauaillé pour amasser tes
thresors, & les conseruoiet pour la
necessité, ne les dépense pas legere-
mēt. Le tēps viēdra que tu en auras
besoin les ennemis sōt tousiours aux
aguets il n'est pas necessaire que tu
paroisse impuissant dās l'occasiō, si
tu distribue tout ton biē au peuple,
il touchera à chacun la valeur d'un
grain de millet, & si tu prends
d'un chacun la grosseur d'un grain
d'orge d'or, tu amasseras de gran-
des richesses qui te pourront estre
vtilēs vn iour, le Roy a ces remon-
strances, (répondit avec colere)
Dieu m'a donné ce Royaume pour

prendre & pour donner, & non pour estre gardien de trefors, le Roy Caron auare & tenant a esté exterminé avec quarante grands trefors, & N'acheroüan qui estoit liberal n'est pas mort, sa memoire vit encor parmi les hommes.

On dit que le iuste Nacheroüa estant allé à la chasse, voulut faire cuire au milieu des champs ce qu'il auoit pris pour en manger, les gés se trouuant sans sel, l'vn deux fut enuoyé au prochain vilage pour en apporter. auquel Nacheroüan fit commandement de payer le sel qu'il apporteroit afin qu'on ne vint à establir vn droict ou coustume en ce vilage de payer le sel en tels rencontres, & que les païsans n'en fussent incômodez, quel mal

dirent les gens, peut-il arriuer de si peu de chose? Cy deuant, respondit-il, il y auoit fort peu d'iniustice au monde, tous ceux qui sont venus y ont ajousté quelque chose, & l'ont accru au terme qu'il est à present, si vn Roy prend vne pomme sans payer d'as la vigne de son peuple, ses Officiers arracheront les racines du pommier, si vn Roy permet de prendre vn œuf iniustement les soldats tueront mille poules : telle iniustice ne subsiste long temps & cause mille maledictions à son autheur.

I'ay ouy raconter qu'un Ministre ruinoit le peuple pour remplir les coffres du Roy, sans considerer que les sages ont accoustumé de dire que celui qui déplaist à Dieu pour assujettir le peuple souffre.

sa main, il excite le peuple contre luy pour venger ses deportements, & le faire consumer dans le feu qu'il a luy-mesme allumé. On dit que le Lió est le Roy des animaux & que l'asne est le plus abject de tous. Neantmoins l'asne qui porte bien son faiz est plus à estimer que le lyon qui deuorent les hommes, quelquefois les cheuaux ardans & vigoureux meurent en voyage cependant qu'un asne apporte doucement sa charge au logis. Vn iour le Roy ayant esté aduerty des iniustes deportements de ce Ministre le condamna à de gráds chastiments & le fit seueremet punir, vn d'entre le peuple qui auoit resenty les effects de ses tyrannies, le voyant dans les tourments s'arrestant tout court s'écria, Cét hom-
me

me a englouty vn os qui s'est attaché à les entrailles & luy déchire le ventre.

On dit qu'un meschant homme Ministre d'Estat & Fauory du Roy ietta vn iour vne pierre à la teste d'un Dreuis, lequel ne se pouvant vanger releua la pierre, & la garda quelque temps, iusques à ce qu'un iour le Roy indigné contre ce fauory le fit ietter dans vn puits, alors ce Dreuis, vint à la bouche de ce puits & lui ietta sur la tête la mesme pierre, pourquoy, dit ce fauori, afflige tu dauantage vn pauvre miserable, pourquoy me iettes tu cette pierre? Je suis vn tel respondit-il, cette pierre est celle que tu m'as jettée en tel lieu. Où as-tu demeuré si long-temps, repliqua-t'il? Je songeois, adiousta le Dreuis, à la

E

charge que tu occupois à la fa-
ueur que tu auois, maintenant que
ie te treuve dans vn puits, ie me pre-
uau de l'occasion. Les sages disent
qu'il faut craindre vn homme mé-
chant & sans merite, lors qu'il est
constitué en dignité. Celui qui em-
poigne vne espée trenchante se
blesse la main. Il faut auoir pati-
ce, le temps punit les méchants
& fauorise les gens de bien.

Vn des soldats d'Omalis accu-
sé d'auoir fuy de l'armée fut con-
duit deuant le Roy par comman-
dement du Vizir qui conclut à la
mort, pour le faire seruir d'exem-
ple aux autres; ce soldat se croyant
prés de sa fin, se proterna deuant le
Roy parlant de la sorte. Grand
Prince, il t'est licite de faire de moy
tout ce que tu auras agreable, quel-
le raisõ peuuét apporter tes subjets

contre tes intentions , qui se peut
iustifier deuant son Prince courrou-
cé, ta hauteſſe doit commander, &
ie dois obeïr, mais ayant eſté long-
temps eſſeué & nourry par tes bien-
faits , ie ne ſouhaitte pas que tu ſois
accuſé au iour du iugement de m'a-
uoir fait perir iniuſtement , ſi tu es
en reſolution de me faire mourir,
commande que ce ſoit avec iuſti-
ce. Comment dit le Roy, te feray-
ie mourir avec iuſtice? Laiſſemoy
tuer ton Vizir , répondit-il , puis
tu me feras mourir avec raiſon. Le
Roy ſouſ-riant de ce diſcours de-
māda à ſon Vizir ce qui lui en ſem-
bloit. Monarque genereux, répon-
dit-il, Ie te coniure par les cendres
de ton pere de lui pardonner, afin
qu'il ne me iette en quelque mal-
heur , j'ay failly en ſollicitant ſa

mort , les sages ont accoustumé de
de dire. Lors que tu iettes vne pier-
re contre ton ennemy , prend gar-
de à toy : car tu es le but de la sien-
ne.

Vn Roy Arabe commanda vn
iour à ses Ministres d'augmenter
de la moitié la pension & entrete-
nement d'un sien seruiteur , qui se
rendoit subiect auprès de sa per-
sonne , & obeissoit promptement
à ce qui luy estoit commandé. Vn
Religieux Dreuis se rencontrant à
à ce commandement , sortit incó-
tinent du Palais , & criant à haute
voix , parla de la sorte. On prie
Dieu avec esperance , le desesperé
ne fait la Cour à personne , la gran-
deur paroist en l'obeissance , & le
mépris en la desobeissance. Celui
qui fait ce qu'il doit reüssi en ses in-
tentions.

Vn habitant du Royaume de Zouzan grandement adroict à l'exercice de la lutte, prit en affection vn ieune garçon, auquel il enseigna son adresse & industrie, ne se reseruât qu'un tour qu'il ne voulut enseigner, où qu'il fut negligent de monstrier: ce ieune homme se rendit si fort & adroict que personne ne l'égalait en cét exercice, & disoit publiquement que son maistre sçauoit mieux que lui la methode d'enseigner, mais qu'en force & en souplesse il ne lui estoit pas inferieur. Ce qu'estât arriué aux oreilles du Roy, il en voulut voir la preuue, & pour cét effect fit preparer vn lieu en la presence de tous ses Courtisans auquel ce ieune homme se presenta le premier, semblable à vn elephāt eschauffé, qui veut

emporter les montagnes de fer & les arracher de leur place; son maître connoissant bien qu'il le surpassoit en force de corps se souuint du tour qu'il ne lui auoit pas enseigné, & duquel ce ieune homme ne sçauoit pas le contre-tour, estans tous deux en presence, il empoigne son escolier avec les deux mains & l'élevant en haut le ruë la teste la premiere contre terre, incontinent le peuple se mist à crier d'une voix confuse, & le Roy fit appeller ce vieillard, auquel il fit de grands dons & honneurs, & des reproches à ce ieune homme d'auoir osé s'égalier à celui qui l'auoit esleué, nourry & enseigné. Alors ce ieune homme s'approchant du Roy lui parla en cette sorte. Inuincible Monarque, j'auois appris toute la science

de mon maistre, il ne manquoit que cet iour qu'il m'auoit caché, & duquel il s'est aujourd'huy seruy pour auoir aduantage sur moy. Je l'auois reserué, répondit le maistre, pour vn tel iour qu'aujourd'huy, parce que les Sages disent qu'il ne faut iamais tant donner de force à nos amis qu'ils nous puissent nuire s'ils deuiennent nos ennemis. Celui qui enseigne à tirer de la flèche doit prendre garde d'estre vn iour la butte de son escolier.

Vn Religieux Dreuis, zélé en sa religion & retiré au coin d'un rocher pour y passer ses iours solitairement, voyant passer le Roy avec toute sa Cour, ne voulut sortir de sa grotte pour lui faire la reueréce, estimant le mespris du monde vn Souuerain contentement. Le Roy

offensé de cette irreuerence le vint
treuver, disant que telles gens es-
toient semblables aux bestes sau-
uages, & interrogé du Vizir pour-
quoy il ne rendoit ses deuoirs au
Roy & ne lui faisoit offre de ses ser-
uices, Dy au Roy, répondit-il, qu'il
doit esperer d'estre seruy de ceux
qui esperent quelque bien-faits de
lui, & sçache qu'il est Roy pour gar-
der le peuple d'oppressiō. Les Rois
grāds & puisās sōt gardiēs des pau-
ures. Les brebis ne sōt pour garder
le pasteur, mais le pasteur est pour
auoir soin des brebis, plusieurs sont
mal-heureux le soir, qui ont esté
heureux le matin, la terre nous cō-
sōmetous; on ne reçoit les cen-
dres d'un Roy avec celles d'un pau-
vre religieux Dreuis. Ce discours
fut agreable au Roy qui conuia ce

Dreuis de lui demander quelque chose , & le pria de l'aider de ses conseils. Ie t'esupplie, répondit-il, de ne troubler mon repos, & pense maintenant que tu es en prospérité , que tu as receu ta grandeur d'autrui de main en main, qu'elle passera au pouuoir d'autrui de main en main.

Vn Vizir se plaignant vn iour à son amy Zaluon Mesri , disoit qu'il trauailloit iour & nuit aux affaires d'Estat, sans pouuoir prendre aucun repos, parce qu'il esperoit quelques bien-faits du Roy, & apprehendoit son indignation, si ie craignois autant Dieu respondit Zaluó Mesri, que tu crains le Roy, ie serois vn grand homme de bien. Si les Ministres auoient autant de peur de Dieu que de leur Prince, ils

feroient tous des Anges.

Le Iuste Nacheroüan ayant vn iour assemblé ses Ministres pour prendre leurs aduis sur les importantes affaires de ses Estats , le chef du Conseil ne voulut opiner iusques à ce qu'il eust appris l'opinion & intériõ du Roy , laquelle il suiuit de point en point , & desapprouua l'aduis & conseil de ses cõpagnons, lesquels se voyãts irritez de sõ procédé, il leur parla en ceste sorte, l'ay suiui l'aduis du Roy , par ce que ie ne sçay l'issuë de telles affaires, vos conseils sont dans l'apparence de la raison , mais l'euenement en est incertain , i'ay cru meilleur de suiure l'aduis du Roy , par ce que si l'affaire n'ereüffi, ie suis exempt de sa cholere. Celuy qui contrarie les Rois laue ses mains avec son sang,

s'ils disent qu'il est nuit à Midi, il faut dire voila la Lune, voila les Estoilles.

Vn grand Seigneur, mais meschant homme poussé de cholere, dit vn iour milles iniures atroces à vn hôme de bié, lequel plein de patience respôdit en ceste sorte, ie suis plus meschant que tu ne pourrois dire, ie sçay mes defauts mieux que toy, celuy n'est pas homme qui veut combattre en presence des Sages contre vn Elephât courroucé, au contraire celuy est homme qui en sa cholere parle avec poids & mesure; ne pique personne si tu ne veux rencontrer des espines en ton chemin.

Vn Courtizan qui auoit quelque employ à la suite du Roy, dit vn iour à vn sien frere qui viuoit af-

sez pauurement de son trauail & industrie avec la force de ses bras. Pourquoi ne te iettes-tu au seruice du Roy pour te deliurer de la peine que tu as? Pourquoi respondit-il, ne trauaille-tu pour te deliurer de la subiection où tu es? les Sages disent qu'il est meilleur de manger du pain d'orge en repos, que de demeurer tousiours sur ses pieds, il est meilleur de petrir du pain d'orge avec les mains, que de les tenir tout le iour sur l'estomac ou au chapeau, nous employons assez bien nostre temps si nous nous gardons du chaud & du froid. Je suis plus content que ceux qui deuiennent bossus à force de se courber en presence des grands.

Haron Racheit ayant conquis tout le Royaume d'Egypte, dict

qu'il ne vouloit laisser cet Estat à vn superbe Pharaon , qui se fit nommer Dieu, mais au moindre & au plus humble de ses seruiteurs, iugeant digne de la Royauté vn sien esclau More nommé Kroufib , lequel estoit si experimenté aux affaires du monde, que rencontrant vn iour des pauvres Laboureurs qui se pleignoient, de ce que la pluye estant venue à contre-temps, le Nil se feroit débordé, & auroit gasté & ruiné les cottons qu'ils auoient semez aupres le riuage dudit fleuue, il leur dit qu'ils deuoient auoir semé de la laine, & qu'elle ne se feroit pas gastee. Vn Religieux Dreuis qui estoit present entendât ce discours se print à rire , proferant à haute voix les parolles qui s'ensuiuent. Si les biens croissoient avec la scien-

ce, l'ignorant seroit bien necessiteux, mais le bien croist si abondamment aux ignorants, que les sages en sont confus, la bonne fortune ne fuit pas les merites, elle nous est donnee du Ciel. On void nombre d'ignorants esleuez en honneur & dignité, & plusieurs sages mespriez, souuentefois celuy qui estudie l'alchimie meurt necessiteux, cependant que les ignorants treuvent des thresors dans les ruines des vieux bastiments.

Vn Roy estant vn iour yure voulut coucher avec vne sienne belle esclauue, laquelle ne voulut consentir à ses plaisirs, à cause de son yuognerie, dont ce Prince estant irrité, de cholere la donna à vn sien More, le plus laid des hommes qui ayent iamais esté, sa levre de dessus

estoit si grosse qu'elle luy couuroit le nez, & celle de dessus tomboit sur son menton cōme vn rideau, il sēbloit vn abregé de laideur, & vn cloaque de puanteur ; au premier rencontre il deuint amoureux de ceste fille & la depucela si tost qu'elle fut en sa puissance, peu de de temps apres le Roy estant reue-nu à foy demanda ceste fille, & ayant appris ce quis'estoit passé de son pucelage, en fut tellemēt courroucé, qu'il commanda de jeter dedans vn puits le More & la fille, alors vn de ses Ministres homme de bien luy parla en ceste façon, Grand Prince, le Moré n'a point de coulpe en cette occurrence, tous tes seruiteurs sont accoustumez de receuoir tes bien-faits, & d'en vser. Pourquoy dit le Roy, n'a-il pas at-

tendu quelque iours auât que coucher auprès d'elle? ie luy aurois fait des dons & bien-faits de beaucoup plus grand prix que cette esclau ne vaut? vn homme respondit ce Ministre, qui brusle de soif, s'il arriue à vne fontaine d'eau douce, ne songe à philosopher sur la nature des Elephans. Vn qui meurt de faim, s'il arriue à vne table bien couuerte ne songe à prescher le Carême. A ta consideration, repliqua le Roy, ie pardonne au More, mais que faut-il faire de cette fille mutine, tu feras bien adioustâ le Ministre de la laisser à ce More, elle est digne de luy, où en treuerra-elle vn autre, personne ne boit de l'eau sucree respandue sur vn fumier, si vn punais & tigneux auoit mordu dans vne

dans vne pomme, qui la voudroit
acheuer de manger.

DE L'HUMEUR DES *Dreuis.*

CHAPITRE II.

VN grand Seigneur de Perse demanda vn iour à vn deuot, ce qui luy sembloit d'vn certain Religieux Dreuis, par ce que quelques personnes en parloient avec des-auantage? Ie ne luy vois, respôdit-il, aucun defaut en l'exterieur, & ne sçay ce qu'il a en l'interieur, tous ceux que tu verras vestus en Religieux croy, les sages & gens de bien, encore que tu ne sçache ce qu'ils font dans leurs ames,

F.

les voyeurs n'ont aucune affaire dans les maisons des particuliers qui ont soin des grands chemins & ruës publiques.

Vn Dreuis voyant vn iour vn larron sortir du Conuent fasché & mal content de ce qu'il n'auoit rien treuue à desrober, prit vn tapis sur lequel il dormoit & le jetta au chemin de ce larron pour luy oster son mescôtentemēt. l'ay ouy dire, que ceux qui sont au chemin de Dieu qui ne donnent aucune fascherie à leurs ennemis, lors que tu seras arriué à ce poinct, tu cōnoistras qu'il n'est honnesté de faire mal à tes amis.

Quelques personnes de condition s'vnirent vn iour pour voyager ensemble, & estre compagnōs en bonne & mauuaise fortune,

leur merite fit naistre le desir d'entrer en leur compagnie , & encore que ie ne fusse ignorât que les riches & les grands ne prennent plaisir de s'etretenir & pratiquer avec les pauvres , ie ne laissay de leur faire offre de mô service, & les priay de me recevoir avec eux. Alors vn d'entr'eux me dist que ie deuois prendre sujet de mescontentement s'ils ne me receuoient en leur cōpagnie. Ces iours passez , disoit-il , vn larron se ietta entre nous sous figure d'un hōme de biē, lequel se cōporta quelque temps assez honorablemēt. On peut lire ce qui est dās vne vie ouuerte , mais on ne peut sçauoir ce qui est dās la chemise d'un homme , il estoit vestu en Dreuis , son eloquence , son sçauoir & son habit de Religieux nous conuierent à le carresser , la nuit estant

tous arriuez auprès d'un Chasteau pour y prendre nostre repos, il se leua à nostre insceu, & s'en alla au prochain hameau, où il derroba & vola tout ce qu'il pût rencontrer, cependant que nous reposions innocemment. Le matin nous fusmes tous accusez de ce larcin, & mis dans le Chasteau, nous eusme prou de peine à nous lauer de cette accusation & nous deliurer de la prison. Cela fut cause que nous nous separames tous, & que chacun prit le chemin que bon luy sembloit. On dit que celuy qui aime son salut doit fuir la foule & multitude du peuple : Les bœufs qu'on veut engraisser sont separez de paturage d'auec les autres bœufs du village. Loué soit Dieu, luy répondy-ie, que si ie demeure seul i'ay profité en ton discours qui

me seruira de leçon à l'aduenir, il est vray qu'un ignorant est ennuyeux à la compagnie des doctes. Vne charongne iettée dans un estang plein d'eau rose & de nafre la salit & corrompt.

Vn Dreuis fut un iour conuié par le Roy de dîner avec luy & avec quelques vns de ses fauoris : Apres dîner estant retourné en son logis il demanda à dîner à son fils, lequel luy demanda pourquoy il n'auoit dîné au festin du Roy & de ses fauoris. I'en'ay rien mangé qui vaille, répondit-il, en la présence de ces gens-là, la priere mesme que i'ay faite en disant graces n'a aucun mérite. O vous qui à cause de vos grandeurs estes portez sur la paulme de la main, desquels les deffauts sont estimez & embrassez, si vous tombez en neces-

sité que deuiendrez-vous, que treu-
ueriez-vous avec fausse monnoye,
que deuiendrez vous avec vostre
ignorance & superbeté. Il y a plu-
sieurs Grands qui presument beau-
coup d'eux si Dieu leur auoit ouuert
les yeux ils ne verroient rien de plus
abiect qu'eux; le Paon se glorifie de
son beau plumage, s'il regarde ses
pieds il deuiendra honteux.

On dist vn iour à vn vieillard qui
auoit égaré son fils, pourquoy il ne
l'alloit chercher au Royaume d'E-
gypte ou dans le puits de Canaan,
pour mettre fin à son afflictio. Nous
sommes, répondit-il, semblables à
l'éclair qui paroist & disparoist en
mesme instant, quelquefois pleins
d'honneur & de contentement, &
quelquefois accablez de malheurs.
Le monde est sujet à vne perpetuel-

le alteration, si les Religieux Dreuis demeuroient tousiours en mesme estat, ils auroient perdu les contentements de l'un & de l'autre monde.

Vn Dreuis accusé d'auoir derrobé vn tapis à vn sien amy fut condâné à auoir la main couppee, le maistre du tapis touché de cōpassiō, pria le Iuge de luy faire grace & qu'il luy feroit present du tapis, à quoy il répondit, qu'à sa priere il ne pouuoit contreuenir aux loix & ordonnances, & se retournant du costé du criminel, luy demanda quelle necessité l'auoit obligé à dérober le bien d'un sien amy. Seigneur, répondit-il, le prouerbe dit qu'il faut vider la maison de son amy, & ne pas heurter à la porte de son ennemy, il faut prendre à son amy, puisque on ne

peut aller chez son ennemy.

Vn Dréuis vit vn iour en songe vn Roy qui estoit en Paradis, & vn Religieux qui estoit en Enfer, dont il fut tout estonné, croyant que le Religieux deuoit estre en Paradis, & le Roy en Enfer, & fit son pouuoir pour sçauoir le sujet du mal-heur de l'un, & du bon-heur de l'autre. Ce Roy, luy dit-on, est allé en Paradis, parce qu'il auoit creance aux Religieux, & ce Religieux est allé en Enfer, parce qu'il auoit creance aux Rois : Le Roy est heureux qui frequente les Conuents des Religieux, & le Religieux deuient meschant qui frequente la Cour.

Vne Carauane fut volée au pays de Ionan où les voleurs treuuerent vn grand butin, les marchants priuez de l'aide de Dieu & des Prophe-

tes, vn d'eux dit au Docteur Locman, Remoſtre à ces larrôs leurs pechez, peut-eſtre que touchez de ta doctrine ils nous laiſſeront nos facultez: C'eſt peché de perdre tant de bien. C'eſt peché reſpondit-il, de preſcher telles gens, le clou n'entre dans le marbre: ceux qui reſuſent l'aumofne aux pauvres, les obligent à la prendre par force.

L'ocman interrogé de qui il auoit appris la ciuilité. Je l'ay appriſe, reſpondit-il, des inciuids lors qu'ils ont fait quelque choſe qui ne m'agreoit pas, ie m'en ſuis abſtenu. Vn ſage qui veut enſeigner l'honneſteté, ſert de riſée aux ignorans.

Vn deuot liſoit toute la nuit des liures de deuotion, & mangeoit chaque nuit en veillant dix liures de pain, ce qu'eſtant arriué à l'oreille

d'un Religieux Dreuis, il dit, qu'il feroit mieux de dormir, & ne manger que la moitié d'un pain, il faut estre sobre pour estudier : celui qui est plein de viâde est vuide de sciëce.

Le fis vn iour mes plaintes à vn vieillard de ce que certains personnages auoiet mesdit de moy. Rends les honteux, me dit-il, par tes bonnes actiôs à ce qu'ils ne puissent mesdire de t'oy, on ne blasme iamais vn violon qui fait de bons accords.

Vn Roy grâdement malade, sentât approcher la fin de ses iours n'ayât point d'ëfant pour lui succeder, fit son testament & ordonnance de derniere volôté, par laquelle il donna ses Estats à celuy qui entreroit au matin le premier dans la ville, lequel se rencôtra estre vn gueux couuert de haillons, qui n'auoit iamais gaigné la valeur d'un pain. Les prin-

cipaux Ministres d'Estat pour euitier la ialousie entr'eux obeirét au commandement du Roy, mirent la couronne royalle sur la teste de ce gueux, & luy consignans les clefs des Chasteaux & thresors de leur Prince, lui recômanderét les affaires du Royaume. Il regna quelque tēps assez heureusement iusques à ce que quelques vns des plus puissants de ses sujets, mesprisant ses commandemens, s'unirent avec les Rois ses voisins pour lui faire la guerre, en laquelle il perdit la bataille & vne partie de ses Estats, dont il fut grandement affligé. En mesme temps vn gueux qui estoit son ancien camarade, arriua en sa Cour, qui le voyant en cette grandeur s'approcha de lui, parlant en cette sorte, Je me réjoüis & rends mille graces à Dieu, de la grace qu'il

t'a fait de t'auoir esleué en vne si haute dignité, la peine est suiuite du repos & l'affliction de la consolation, les fleurs sont quelquefois seiches & quelquefois espanouies, les arbres sont quelquefois couuerts de fructs, & quelquefois dépoüillez, on dit que la fontaine de Iouence est dans les tenebres. M^o cher amy, respondit-il, Tu as plus de subject de me cōsoler que de te réjouir avec moy de ma fortune: lors que nous estiōs ensemble, ie n'auois soin que d'auoir du pain, aujourd'huy ie suis accablé des affaires de tout le monde. La pauureté nous fasche, & si nous sommes riches nous sommes tourmentez pour conseruer nostre bien, si tu es bien aduisé cherche ton contentement en toy-mesme, on est grand Seigneur lors qu'on est

content, la patience des pauvres est préférée aux aumônes des riches.

Vn Dreuis se voyant tous les iours visité par Aborirhe avec les offres de son seruice, luy parla en cette façon.

Ne me visite pas si souuent, afin que nostre amitié s'augmente: personne n'est amy du Soleil, encore qu'il soit beau, parce qu'on le voit tous les iours, on en fait plus de cas l'hyuer, lors qu'il est caché & voilé: ce n'est pas honte de paroistre deuant le monde, mais sçache que le contentement est dans la solitude, lors que tu seras seul, personne ne t'offensera.

Vn Dreuis fut vn iour conuie d'aller voir vn de ses amis qui auoit esté fait Ministre d'Estat pour le congratuler de sa nouvelle dignité, & que ne voulât faire vn des seruiteurs

de son amy qui estoit present lui demanda quel mescontentement il auoit receu de son maistre ; ie n'en n'ay receu aucun , respondit-il , mais ie ne me veux pas resioüir avec lui de sa faueur , pour n'estre pas obligé de pleurer avec lui au iour de sa dilgrace.

Vn grand Seigneur pressé d'une ventosité qui l'importunoit ayant fait vn pet sans y penser , pria la compagnie de l'excuser , parce que c'estoit sàs dessein de l'offenser , & qu'il en auoit receu vn tres-grand soulagement , le ventre est la prison des vents , personne ne les peut attacher ; il les faut laisser sortir pour estre deliuré de leur importunité. Lors qu'un meschant homme voudra sortir de sa maison ne lui mets la main deuant pour l'empescher de sortir.

Ayant vn iour receu quelque mécontentement de quelques vns de mes amis de la ville de Damas, ie me retiray de déplaisir dans les deserts de Ierusalem, où ien'auois autre cōpagnie que celle des animaux, iusques à ce qu'un iour ie fus pris exclave par les Chrestiens qui me firent trauailler avec les Iuifs aux fossez des fortifications de Tripoly, vn des principaux marchands d'Alép de ma connoissance, passant par ladite ville s'enquist de moy de l'Estat de ma santé & de la cause de mon malheur, Ie m'estois, luy dis-je, retiré dans le desert, afin de n'estre avec personne qu'avec Dieu. Pense à ce qui m'est arriué, puisque tu me vois auiourd'huy en la compagnie de ses mauuaises gens; Il est meilleur d'auoir la chaisne au pied avec des

gens de bien que d'estre dans vn iardin avec des meschants. Il eut pitié de moy à cause de nostre ancienne connoissance, & in'ayant rachepté pour le prix de dix sequins, il me mena en Alep, où il me donna vne sienne fille en mariage moyennant cent sequins de douaire auquel il me fit obliger, sa fille estoit laide, babillarde, querelleuse, & de si facheuse humeur que ie ne pouuois viure avec elle qu'avec mille desplaisirs. Vne meschante femme est vn Enfer en la maison d'vn homme. Vn iour la voulant admonester de son deuoir, & quoy me dit-elle, n'estu pas cet esclau que mon pere a deliuré pour dix escus, il est vray, luy dis-je, qu'il m'a rachepté dix escus, & m'a mis entre tes mains pour cent escus. I'ay ouy dire qu'vn Veneur deliura

deliura vn iour vn agneau de la gueulle du loup, & le soir lui mit le couteau à la gorge; Ton pere m'a deliuré de la gueulle du loup, mais ie voy bien qu'il m'y a remit puisqu'il m'a mit entre tes mains.

Vn Religieux Dreuis ayant lógt-temps fait penitence dans vn bois, où il n'auoit vescu que de fueilles d'arbres pour plus grande mortification, fut visité par le Roy qui luy fit offre d'un lieu pour demeurer en la ville, où il pourroit vacquer à ses oraisons journalieres avec plus de commodité, & où le peuplé se preuandroit de sa benedictio & de son bon exemple. Apres quelque refus il accepta la grace du Roy, qui luy donna vn appartement dans le iardin de son Palais, le plus beau & le plus recreatif qui se pouuoit desirer.

G

il luy donna vne belle esclaué si parfaite & accomplie que chacun perdoit patience en la voyant, & eust esmeu les plus froids personnages du monde, aussi comme le feu se prend quelquefois au bois verd, ce Religieux iettât les yeux dessus cette fille, ses cheueux furent autant de chaines pour attacher son esprit, le bon traitement luy fit reuenir son embompoinct, & les bien-faits du Roy le rendirent grandement puissant. Ceux qui avec leur doctrine sont pauvres & necessiteux sôt semblables à la mouche qui demeure attachée par les pieds dans le miel, & ceux qui ont du bien sont estimez puissans & iouissent de mille contétemens. Vn iour le Roy fut desireux de le visiter en son appartement, où il ne trouua plus le visage maigre du

desert, il estoit vestu de rouge cramoisi & d'incarnat, appuyé sur vn coissin de velours, avec des serui-
teurs magnifiquement vestus. Le Roy lui ayant demandé l'estat de sa santé & discouru quelque temps ensemble l'assura de son amitié, & de son affection enuers deux sortes de personnes, c'est à sçauoir, enuers les Doctes & les bons Religieux. Alors vn sien Ministre qui estoit present luy dit, Grand Prince, les loix de l'amitié requierent que tu fasse du bien à tous deux, & qu'ils se ressentent de ton affection : En quelle façon dist le Roy ? Donne, respondit-il, de l'argent aux Docteurs, afin qu'ils puissent estudier, & ne donne rien aux Religieux afin qu'ils soient toujours bons Religieux.

Le Roy estant vn iour en affli-

G ij

ction fit vœu de distribuer vne certaine somme d'argent entre les Religieux s'il sortoit de ses affaires avec contentement, ce que luy ayant succédé heureusement voulant accomplir son vœu, il donna à vn page vne bourse dans laquelle estoit la somme vouëe pour la distribuer entre lesdits Religieux. Ce page chemina & tournoya tout le iour par la ville, & le soir reuint treuver le Roy, aux pieds duquel il ietta ladite bourse & l'argent, disant qu'il n'auoit point treuvé de Religieux. Quelle hystoire est-ce là, dit le Roy, il y en a plus de quatre cens en cette ville? Grand Roy, respondit-il, Celuy qui fera bon Religieux ne prendra point d'argent, & celuy qui en prendra ne sera pas Religieux.

Vn Docteur interrogé de ce que lui

sembloit du reuenu & des rentes des temples & Conuents. Ceux respondit-il, qui desirent le reuenu des Temples pour estre en la cōpagnie des Religieux, & deueloppez des affaires du monde vaquent à la priere & oraison, font fort bien, mais ceux qui desirent le reuenu des Temples pour en iouir simplement offensent Dieu, Nous ne sommes pas dans les Conuents pour manger, nous y mangeons pour viure en priant Dieu.

Vn Dreuis se plaint vn iour à vn sien compaignon, de ce qu'il estoit grandement importuné du monde qui le venoit visiter. N'escoute les pauures, luy dit son compaignon, & ne leur baille rien, ils ne te verront plus & demande quelque chose aux riches, ils fuiront iusques à la Chine, pour ne te rien donner.

Le fils d'un Dreuis dit un iour à son pere qu'il ne receuoit aucune edification des sermons des Predicateurs, parce que leurs actions n'estoient conformes à leur discours, ils enseignent le peuple, disoit-il, à quitter le monde & se precipitent pour auoir de l'argent, personne ne croit à celui qui n'a que des paroles. Celui est bon Predicateur qui parle bien & fait bien, le Predicateur qui se plaist à dorloter son corps est semblable au Pilote qui s'est égaré: Comment pourra-t'il seruir de guide & montrer le chemin aux autres? Mon fils, respondit le pere, la Predication est semblable au marché, si tu y vas sans argent tu n'en rapporteras rien, si tu vas à la Predication sans foy, tu n'y profiteras pas.

Vn Religieux Dreuis, passant au-

prés d'un yurongne qui estoit couché au milieu du chemin le regarda de trauers par mespris & mocquerie. Pourquoy, luy dit cét yurongne, me regarde tu de trauers, si ie n'ay fait ce que doit faire vn honnestehomme, fais en mon endroit ce que doit faire vn bon Religieux.

Vn Dreuis rencontra vn iour vn porte-faits si furieusement en colere que l'escume luy en sortoit par la bouche, le Dreuis luy demandant le sujet de son desplaisir, il respondit, qu'un sien voisin l'auoit iniurié. Tu es vn pauvre homme, luy dit alors le Dreuis, tu porte vn faits de dix quintaux, & tu ne peus supporter vne parole.

Vn docteur grandement riche auoit vne fille si laide & si difforme que personne ne la voulant espou-

fer il la maria à vn aueugle. En mesme temps il arriua vn Medecin oculiste en sa ville , qui deinanda à ce Docteur pourquoy il ne faisoit guerir son gendre. I'ay peur, dit-il, qu'il quitte ma fille , à femme laide mary aueugle.

Vn Docteur interrogé quel estoit le meilleur la vaillance ou la liberalité. Celuy qui est liberal n'a besoin d'estre vaillant, vn bien-fait luy sera plus aduantageux que la force de son bras, faits de ta bource comme de ta vigne, elle rendra plus de raisins si tu en coupe quelques branches.

Du Contentement.

C H A P. II.

VN pauvre Religieux Dreuis demandant publiquement l'aumosne dans la place du marché d'Alep, alloit proferant ces parolles. O vous qui estes puissans en trefors, si la raison se treuuoit en vous, la coustume de mandier se perdrait dans le monde; car vous nous feriez part de vos biens & nous de nostre patience, qui est preferable à toutes les richesses de la terre. Le sage Locman prenoit patience en sa pauvrete & se contentoit en icelle. Celuy qui n'est capable de patience, n'est

!

capable de sagesse ny de contentement.

Vn homme de cõdition au Royaume d'Egypte eut deux enfans, l'un desquels s'addonna à l'estude des bonnes lettres, & l'autre appliqua son esprit à acquerir des biens. Le premier deuint grand personnage & grãdemēt estimé à cause de sa doctrine, & le second par ses richesses se fit le plus puissant hõme d'Egypte, regardant vn iour son frere avec mespris, il se mocqua de luy, de ce qu'il estoit demeuré pauvre avec sa doctrine, cependant que par ses thresors il estoit arriué à la principauté. Ie louë Dieu, lui dit son frere, de la grace qu'il m'a fait, i'ay acquis la science, heritage & patrimoine des Prophetes, & tu n'as acquis que des richesses, heritage des Pharaons &

meschants, si ie suis la formis qu'on foule aux pieds , ie ne suis pas vn loup rauissant , duquel chacun souhaitte la perte: Quelle grace puis- ie rendre à Dieu , m'ayant osté le pou- uoir de m'oster aussi la volonté de faire mal à mon prochain.

I'ay veu vn Dreuis pauvre, neces- siteux & mal vestu, qui se consolant soy-mesme , disoit qu'il estoit plus heureux de supporter patiemment la pauureté, que de s'obliger aux hō- mes sous esperāce de leurs bien-faits, la pauureté est plus facile à suppor- ter que l'insolence & mauuaise hu- meur de celuy auquel on est obligé. Vn honneste hōme dit vn iour qu'il y auoit vn riche personnage dans la ville qui tiendroit à faueur de luy faire du bien s'il luy faisoit offre de son seruice. Tay-toy , repondit-il,

j'aime mieux viure en ma pauureté que d'entrer au seruice des Grands, c'est vn tourment égal à celui d'Enfer, que d'estre mesprisé & gourmandé en seruant.

Vn Roy de Perse presenta vn iour à Mahomet vn docte Medecin, lequel ayant demeuré quelque téps en Arabie sans employ & sans pratique, se plaignit de ce qu'il estoit venu pour traitter les malades, & que personne n'auoit recherché ses remedes pour faire preuue de son sçauoir. C'est la coustume de cette nation, dit Mahomet, de manger sans auoir faim, & se leuer de table avec appetit; mais ce Medecin luy baïsa les mains & prit congé de luy, disant, qu'à gens sobres il ne falloit point de Medecin.

Vn Dreuis interrogé pourquoy

son voisins s'est addonné au vice & vit plus licétieusement que de coustume: C'est qu'il mange trop, respondit-il, & vit trop delicatement; on doit prendre garde de ne carresser son corps outre mesure. Vn loup ayant esté long-temps nourry soigneusement par vn Veneur rompit ses chaines & déuora son maistre.

On dit vn iour à vn Dreuis pauvre & necessiteux, qu'il y auoit vn homme en la ville grandement riche, qui sans doute lui feroit du bien, s'il se faisoit connoistre à luy, ce qu'ayant ouy, il pria vn habitant dudit lieu de le conduire au logis de ce riche, où estant arriué, il le treuva assis dans vne chaire, avec vne mine refronquée, cōmes'il eût esté bien en colère, incontinent qu'il l'eust vû il sortit sans mot dire. Interrogé par celui

qui le conduisoit de ce qu'il auoit fait, & pourquoy il n'auoit dit mot. Je donne les bien-faits, respondit-il, à sa mauuaise mine, i'ayme mieux me passer de sa courtoisie que de supporter vn visage si refrongné avec vn tel mespris.

Katentai grandement estimé à cause de sa generosité, interrogé s'il auoit iamais veu personne plus genereuse que lui, respondit qu'ouy, & qu'un iour faisant vn sacrifice d'un grand nombre d'animaux, en vn festin auquel il auoit inuité tout le peuple, estant ce mesme iour sorty hors de sa maison pour quelque affaire, il rencontra vn homme ayant grandement soif, qui portoit au marché vn fagot de pines sur ses espaulles pour le vendre, & en acheter du pain, auquel il dit, que Ka,

tentai faiçt aujourd'huy vn festin à tout le peuple , pourquoy n'y es tu pas allé. Celui, respondit ce pauvre homme , qui peut viure du trauail deses mains, ne se doit obliger à Katentai pour vn repas.

Vn nommé Iafer s'estant égaré dans le desert , lassé & trauaillé de faim, & de soif, il deuint si foible que ne se pouuant soustenir, il ietta son argent par terre pour se soulager de ce fardeau, & ne pouuât plus marcher priué d'esperâce de secours, tomba mort sur le sable, quelques vns passant par là ramasserent son argent, enseuelirēt ce pauvre corps, & luy firent cēt epitaphe. Si Iafer auoit tout l'or du monde, il n'auroit l'accomplissement de ses desirs, le pauvre homme enseuely en ce de-

fert, a eu plus de besoin d'une raue cuitte que d'argent.

Vn Dreuis voyant vn iour vn homme de mauuaife mine, porter des habits de grand prix monté sur vn beau cheual, demanda à son compaignon ce que lui sembloit de ce personnage: Il semble, respondit-il, à vne escriture dorée sur vne muraille. Il est meilleur d'estre bon & de bonne grace que d'auoir de beaux habits.

Le fils d'un luitteur, vaillant & courageux, fasché que ses affaires ne prosperoient pas selon son desir, s'affligea de telle façon, que peu s'en fallut qu'il n'en mourut, en cette alteration, il vint treuver son pere, & luy parla de la sorte: Je suis, dit-il, resolu de quitter ce pays, peut-estre qu'en pays estrangers j'arriueray par la force

la force de mes bras & par ma valeur au but de mes intentions; la vertu & le merite sont inutiles s'ils ne paroissent; le bois d'Aloës & les parfums ne rendent point d'odeur s'ils ne sont dans le feu. Mon fils, respondit le pere, oste cette parabole de ton esprit, attache toy à ton salut & à ton repos; la grandeur & les richesses viennent de la bonne fortune, personne ne la peut arrester par force, s'il y auoit en chaque cheueu de ta teste deux cens vertus attachées; ta vertu sera inutile si elle n'est accompagnée du bon-heur. Que peut faire vn homme de merite laborieux & malheureux, le bras de la bonne fortune est meilleur que le bras de la force & de la prudence. Mon pere, repliqua le fils, les voyages apportent de grands aduantages, ils nous don-

H

nent du contentement & du profit, on y voit des choses estranges, on y entend des choses merueilleuses, on voit la diuersité des estars, on acquiert des amis, on se rend capable de charge & d'employ, on apprend l'honnesteté & la ciuilité, on augmente ses biens & son sçauoir, on apprend l'experience de plusieurs choses considerables. Ceux-là semblent estre grossiers & casaniers qui demeurent tousiours dás leurs maisons, il faut voir le monde auant que d'en sortir. Mon fils, dit le pere, il y a comme tu dis de grands aduantages aux voyages, mais ils ne sont propres que pour cinq sortes de personnes. Premièrement, pour les riches qui ont nombre de seruiteurs, tous les iours ils sont dans les bonnes villes, toutes les nuicts dans de bons lits, & tout le iour dans les pourme-

noirs & dans les diuertissemens. Les riches ne sont iamais estrangers en quelque part qu'ils soient, ils peuvent planter leurs pauillons & prendre leurs repos; les pauvres sont estrangers au lieu mesme de leur naissance, & n'y sont connus de personne. Secondement les voyages sont bons pour les doctes & sçauants, qui par leur doctrine sont estimez & caressez en quelque part qu'ils aillent, on les respecte, on leur rend seruice & honneur. La rencontre d'un homme docte est semblable à un ruisseau d'or, en quelque part qu'il aille on sçait son prix. En troisieme lieu, les voyages sont bons pour ceux qui sont beaux, bien-faits, bien nez, & de bonne grace, chacun desire s'accoster d'eux: un peu de gentillesse & de beauté vaut quelquefois autant

que les richesses, vn beau visage console vn cœur affligé, & est la clef d'une porte fermée, en quelque part que soit vn homme bié nay chacun lui rend respect & honneur, & si ses parents le chassent & l'abandonnent, il treuueramille personnes de condition qui le receuront. En quatriesme lieu, les voyages sont bons pour ceux qui chantent bien, & sont bons musiciens, qui par la douceur de leurs voix arrestent le cours des eaux, & le vol des oiseaux; avec cette vertu ils attirét les hommes à eux, & acquierent les bonnes graces des grands: vne belle voix est preferable à vn beau visage, vn beau visage contente le corps, & vne belle voix contente l'ame. En cinquiesme lieu, les voyages sont bons pour ceux qui scauét quelque mestier, qui par leur

industrie, & avec la force de leurs bras peuuent gagner leur pain & se garder de necessité. Si vn Roy se treuuoit incognu sans argent en pais estranger il seroit en hazard de souffrir les incommoditez de la faim. Mon fils, ie t'ay fait ce discours des choses necessaires à ceux qui veulent aller en pais estranger: ceux qui n'ont pas des perfections que ie viés de dire voyagent inutilement, & ne sont estimez de personnes. Comment accordera-on? respódit le fils, les paroles des Sages qui disent, qu'écor qu'on soit destiné à auoir du bié, c'est à condition de l'acquérir, qu'écore qu'on soit destiné au malheur, il est raisonnable qu'on tasche de l'euitier, & qu'encore qu'un homme ne puisse mourir que l'heure du destin ne soit venue, il ne se jette pas pour

cela en la bouche du vipere : En l'estat où ie suis i'attaquerois vn Elephant courroucé, & me jetteroies sur les griffes d'un Lyon furieux : ie suis resolu de voir les nations estrange-res : celuy qui est malheureux en son pais ne doit pas estre fasché d'en sortir, tous lieux luy seruiron de patrie, les riches se retirent auant la nuict en leurs Palais pour reposer, & le pauvre faict son Palais où la nuict le prend; qu'à-il besoin de maison, en quelque lieu qu'il aille il est logé chez Dieu : avec ce discours il prit congé de son pere. Apres auoir cheminé quelque iours il arriua sur le bord d'un fleuve si violent & si rapide, que les pierres que l'eau entraisoit heurtant les vnes contre les autres, faisoient vn bruit qui s'entendoit de douze mil pas, les oyseaux de

riuiere ny osoient demeurer, la violence des ondes eut fait moudre vn moulin de pierre: il demeura longtemps sur le riuage en peine de quelle façon il passeroit à l'autre bord, iusques à ce qu'il aperceut vn grand bateau, dans lequel estoient plusieurs personnes bien vestuës & bien couuertes, armez de fleches & carquois dorez, qui sembloient estre voyageurs. Ce ieune homme n'ayât point d'argent pour payer son passage, se confiant seulement en sa valeur, pria les mariniers de le passer par courtoisie, les assurant qu'ils les seruiroit genereusement aux occasions qui se presenteroient. A ce discours ces rustres luy tournerent le dos par moquerie: la valeur & la generosité, dirent-ils, sont inutiles sans argent? Si tu as de l'argent, qu'as-tu

H iij

affaire de valeur & de force, tu ne passeras pas la riuere sans monoye, vn grain d'or a plus de force que cét hommes. Ce ieune & genereux voyageur se voyant mocqué & baf-foué par tels marauts, eust bien desiré de se venger, mais voyant que le bateau estoit desia demaré, il se mit à crier à haute voix; Si mon capot vous est agreable ie le vous presente: Les mariniers poussez du desir du lucre retournerent pour prendre son capot & l'embarquer, l'auarice aueugle souuentesfois les plus sages, & les oiseaux pour vn peu de bien sont pris au trabuchet. Si tost que ce ieune homme fut sur le bord du bateau, il prit vn des batteliers par la main le tira rudement dehors, & pour se venger de leur mocquerie, le battit sans misericorde, ses compa-

gnons sortirent pour le secourir, mais la force & generosité de ce ieune homme leur fit tourner le dos, & ne treuuerent autre expedient que de s'accommoder avec luy, & luy promettre le passage sans argent. Il faut ceder volontairemēt à vne plus grande force; On peut avec douceur & courtoisie mener vn Elephant attaché à vn cheueu, celuy qui est le plus foible doit estre doux: vne espée ne peut couper la foye qui ne fait point de resistance. En fin ces mariniers s'excusent, se iettent à ses pieds, le recoûrent dans leur batteau avec honneur & compliment, & demarèrent incontinent pour continuer leur voyage. L'eau & les vents jettent le batteau contre vn viel pilier qui estoit resté des anciens edifices construits par les Ionanians, les ma-

riniers saisis de peur craignant que le batteau ne s'entrouarist, crierét qu'il estoit necessaire qu'un des plus hardis de la compagnie montast promptement sur le pillier pour attacher les cordages du batteau, afin de reparer le dommage qu'il auoit receu. Ce ieune homme qui faisoit gloire de sa force & generosité, ne fit point de reflexion sur le mauuais traitement qu'il auoit fait à ces mariniers. Celuy qui a rendu déplaisir à un autre, quoy qu'il luy rende mille seruices, il ne lui fera iamais oublier le ressentiment du premier déplaisir : le fer sort de la playe, mais la douleur y demeure: ne te fie pas à celuy que tu as offensé, ne jette pas des mottes contre la forteresse, car elle te jettera des cailloux, & garde toy d'un ennemy reconcilié. Ce ieune homme

plein de courage, sans autre consideration que celle de sa force, prend le bout d'un cable, & saute sur le pilier pour attacher le bateau: les mariniers laschent la corde & poussent le bateau, lequel est emporté par la violence & rapidité du fleuve, & laissent cet estranger sur le pilier tout estonné & confus, il y demoura deux iours sans secours, & le troisieme le sommeil ayant gagné ses paupieres, il cheut dans le fleuve, duquel il se sauua avec beaucoup de peine, & arriua en un riuage desert presque mort, sans poulx & sans mouuement, où il fut contrainct de manger des feuilles d'arbres, & des racines d'herbes pour substantier sa vie. Apres auoir cheminé quelque temps pour chercher un lieu habité, lassé & pressé de la faim & de la soif, il arriua au-

prés d'un puits où le peuple de cette contrée estoit assemblé, il vit que tous ceux qui beuvoient de l'eau de ce puits donnoient vne petite piece de monnoye pour payement de l'eau qu'ils auoient beuë, encor qu'il n'eust point d'argent il ne laissa pas de demander à boire en remonstrant sa necessité: On n'eut aucune pitié de luy, & voulant se preualoir de son courage, & user de violence, vn grand nombre de payfans se ieterent sur luy, le ruerent par terre, & le battirent sans misericorde, il fut blessé en telle façon qu'il tomba sur les carreaux comme priué de sentiment. Plusieurs petites mouches en grand nombre desesperent quelquefois vn elephant, & le lyon avec sa force & sa valeur est souuentefois incomodé par les formis. Bles-

fé, malade, & mal traitté par ces payfans, il fut contraint de se mettre à la suite d'une Carauane qui passoit alors par cette contrée, s'estant arrestez de nuict en vn lieu qui estoit vn receptacle de voleurs, & de mauuaises gens, tous ceux de la Carauane furent saisis d'une grande apprehensió de perir entre les mains des larrons. Ce ieune voyageur fit son possible pour les assurer, disant, que lui seul bateroit & defferoit cinquante homme de telle canaille, son discours anima les ieunes gens de la Carauane, lesquels luy rendirent de grands honneurs, & le firent asseoir au lieu le plus honorable de la table, il mangea avec eux reprit vn peu ses premieres forces, & apres souper commença à dormir d'un tres-profond sommeil. Alors vn vieillard

qui estoit en cette carauane , dit à ses compagnons qu'il n'auoit pas moins de peur de cet estranger que des voleurs mesmes , & adjousta qu'un iour vn Arabe ayant acquis vne assez bonne somme d'argent ne dormoit iamais seul de peur d'estre volé : vn de ses amis estoit perpetuellement avec luy lequel par succession de temps & avec adresse ayant decouvert où estoit l'argent de cet Arabe, le prit & s'en alla sans mot dire, le matin on vit cet Arabe affligé iusques à l'extremité; interrogé de la cause de son affliction, & si les larrons auoient volé son argent, il respondit que non : celui en qui ie me confiois l'a emporté. O qu'il est difficile de coucher avec vn serpent sans estre picqué, la picqueure & morsure d'un ennemy est beaucoup

plus cuifante , lors qu'il pieque & mord sous couleur d'amitié & est ennemy couuert : ſçachez que ce lieu eſt vn receptacle de voleurs, ie crains fort que ce ieune homme qui fait le vaillant ne ſoit du nombre, & qu'il ne prenne ſon temps pour aduertir ſes compagnons ; ie ſuis d'auis que nous partions preſentement, & que nous le laiffions dormir. Ce conſeil fut approuué de tous ceux de la cõpagnie, qui trouſſerent incontinent bagage & s'en allerent, laiffant ce ieune voyageur accablé de ſommeil. Le grand trauail qu'il auoit enduré les iours paffez, & les bonnes viandes qu'il auoit mangé le conuierent à dormir toute la nuit & le lendemain tout le iour, iuſques à Soleil couché ; eſtant reueille il ne vit plus ſa carauane ny ne connoiſ-

soit aucun sentier ny chemin pour la suiure, il va & vient égaré sans sçauoir où il est, enfin pressé de la faim & de la soif, sans espoir de salut, il cheut en terre proferant ces paroles.

O qui me sera secourable! à moy pauvre estranger, personne n'est favorable à l'estranger, que l'estranger mesme, où ceux qui ont esté estrangers. Par hazard vn Seigneur de condition passant en ces quartiers s'estoit escarté de ses gens pour suiure sa chasse, il ouyt la voix de ce pauvre malheureux, il s'approcha & luy demanda quel il estoit, & comment il estoit tombé en cet endroit, ayant appris vne partie des aduentures de ce pauvre homme il eut pitié de luy, & luy fit donner ce qui luy estoit necessaire pour retourner en son païs, où estant arriué, il raconta à ses parens

rents les hazards de son voyage, la rencontre du bateau, l'infidelité des mariniers, l'insolence des païsans auprès du puits, la tromperie de la Carauane, & la rencontre de ce Seigneur. Alors son pere luy dit, mon fils ne t'auois-ie pas dit auant ton depart que ceux-là ont les mains foibles qu'ils ont vuides? vn grain d'or vaut mieux que cinquante quintaux de vertu. Mon pere, respondit-il, il faut trauailler pour acquerir du bié, il faut hazarder sa personne pour obtenir victoire: qui ne semez rien ne recueillir rien. La peine que j'ay endurée me faict treuuer le repos doux comme miel, celuy qui se plonge dans la mer ne rapporte pas tousiours des perles, encor qu'on ne puisse acquerir du bien qu'en tant que le destin le permet, il ne faut

pour cela estre paresseux à le rechercher : le Lyon mourroit de faims s'il demeueroit tousiours dans sa caverne. Les pieds & les mains de celuy qui veut chasser dás sa maison , sont semblables aux aragnes, il ne prédra que des mouches. Mó fils repliqua le pere, le Ciel t'a esté fauorable cette fois, il a séparé tes rozes des espines. Ce Seigneur que tu as rencontré t'a esté secourable, mais vn tel rencontre est fort rare, il ne se faut pas assurer aux choses qui arriuent raremēt, prens garde que le desir d'auoir trop de bien ne te fasse choir encor vne fois dans le malheur. Le Veneur ne prend pas toutes les fois qu'il va au bois, quelquefois il est pris & deuoré par les bestes fauages.

Vn Roy aimant grandement l'exercice de la fléche, donna vne ba-

gue de grande valeur qu'il auoit au doigt, à celuy qui feroit passer sa flèche dedans cette bague, tous les archers s'efforcèrent d'emporter le prix, mais en vain, personne d'entr'eux ne pût donner dedans: vn ieune enfant qui estoit sur vne terrasse qui n'auoit iamais manié ny arc ny flèche que pour ioüer avec ses compagnons, tira si heureusement qu'il donna dedans la bague & emporta le prix, avec de grands bien-faits du Roy, & applaudisseméts de ceux qui estoient presens: Incontinent apres il jetta au feu son arc & ses flèches: interrogé pourquoy il brusloit ses flèches. Ie veux respondit-il, demeurer avec cet honneur, & ne veux plus manier ny arc ny flèche. Quelquefois les conseils des plus sages sont suivis de sinistres éuenements, &

quelquefois les enfans par hazard
donne dans le but.

De l'utilité du silence.

CHAPITRE IV.

VN homme interrogé pour-
quoy il ne disoit mot en cõ-
pagnie. J'aime le silence, respondit-
il, parce que la plus grande partie
des discours du monde sont bons &
mauvais, & que nos ennemis ne
prennent garde qu'au mal. Vn en-
nemy est preferable à vn amy mes-
chant, l'inimitié ne se doit attacher
à vn honneste homme, l'honneur
qui paroist en nos ennemis est vne
honte en nous, le sage sert d'espine
aux yeux de ses aduersaires, & la

clairté du Soleil aveugle la chauue-foury.

Vn marchand ayant perdu mil sequins , fit deffense à son fils d'en rien dire à personne: Pourquoy, dit son fils, me deffendez vous d'en parler, quel secret y a-t'il en cela? Afin, respondit le pere , de ne supporter double déplaisir, l'un la perte de mon argent, & l'autre la resiouissance de mes ennemis.

Vn docteur se trouuant en la compagnie de quelque heretiques disputant avec eux demeura comme surpris sans dire aucune raison pour couvaincre ses aduersaires , interrogé par vn de ses amis pourquoy il ne respondoit rien : Ces gens, respondit-il, niēt les fondemens, la respōse qu'il faut faire à telle gens, c'est qu'il ne leur faut point faire de responce.

Ialious interrogé pourquoy vn sergent auoit iniurié & mal traitté vn Docteur: C'est, respondit-il, parce qu'il est vn ignorant, deux doctes ne se font point de mal. On dit communemét qu'un sage & un fol ne peuuent rompre vne paille, si le fol tire, le sage laschera, & si le fol lasche, le sage tirera, mais deux fols ensemble rompront bien tost vne chaisne de fer.

Vn Docteur interrogé pourquoy il ne vouloit repeter vne chose deux fois, le mesme sucre & les mesmes confitures, respondit-il, ne se mangent pas deux fois.

Mamoud enquis par quelques personnes de condition de ce que le Roy luy auoit dit lors qu'il estoit enfermé avec luy dans son cabinet, respondit qu'il luy auoit parlé

d'une affaire qu'ils sçauoient bien. Tu nous trompe, dirent-ils, il y a quelque autre chose. Pourquoi me le demandez vous, repliqua-il, puis-que vous voyez que ie ne le veux pas dire? Celuy iouë à perdre la teste, qui declare le secret du Roy.

Vn marchant vacillant vn iour en l'achapt d'une maison, vn Iuif demeurant en la rue où elle estoit scituée le vint treuuer, & l'assura que c'estoit vn fort beau logis & à bon marché: Il vaudra bien dauantage apres ta mort, respondit-il, les bons & mauuais voisins font estimer & mespriser les maisons.

Vn Poëte ayant vn iour rencontré des voleurs, fut despoüillé tout nud au temps de la plus grande rigueur de l'hyuer. Les chiens le voyât

passer en cét estat lui coururét apres; il voulut prendre des pierres pour se defendre, mais elles estoient geles en terre. Ces voleurs voyant la peine de ce pauvre Poëte, luy demanderent s'il auoit besoin de leur secours pour se defendre des chiens; Je n'ay besoin de vous, respondit-il, ce luy gagne assez qui se deliure de vos mains avec la vie.

Vn Astrologue retournant en sa maison treuua vn homme couché avec sa femme, dont il fit vn tres-grád bruit, vn Dreuis y accourut, auquel cét Astrologue fit ces plaintes de ce que sa femme faisoit à son insceu. Comment, luy dit le Dreuis, peux tu sçauoir ce qui se fait par dessus les Cieux, puisque tu ne sçay pas ce qui se fait en ta maison.

Le Supérieur d'une Mosquée

preschoit de si mauuaile grace que personne ne vouloit assister à ses Sermons, ses Parrochiens ennuyez de ses facheux & ignorans discours, luy procurerēt vne autre meilleure Mosquee, pour se deliurer de ses importunittez, laquelle il accepta avec mille remerciements. Quelque temps apres il vint reuoir ses anciens Parrochiens, ausquels il dist que les Parrochiens de sa nouuelle Mosquee lui auoient procuré vn benefice qui valloit cent escus de rente plus que le sien, s'il le vouloit accepter : garde toy bien de le prendre, respondirent ces anciens Parrochiens, si tu tiens bon il t'en donneront vn de cinq cēs escus de rente, pour se deliurer de ton ignorance.

Vn Dreuis interrogé pourquoy il ne disoit mot; l'attends, respon-

dit-il, que tout le monde se taife, celui qui parle & interrompt les autres confesse son ignorance.

Vn ieune homme grandement sçauant , interrogé pourquoy il ne disoit mot en compagnie, l'ay peur, respondit-il qu'on m'interroge de quelque chose que ie ne sçache pas.

De l'Amour.

C H A P. V.

VN homme interrogé pourquoy Sultan Mhamond aimoit Aiazé homme laid, difforme & sans esprit, & n'aimoit pas les autres seruiteurs qui estoient beaux, bien-faits & de bonne grace. Cha-

cun treuve beau ce qu'il aime, respondit-il, On n'ose blasmer ce qui est agreable au Roy, & chacun méprise ce qui lui déplaist. Vn Philosophe est vn ignorant, s'il est en disgrâce auprès du Roy. Vn Ange sera laid, s'il n'est agreable au Roy.

Vn Dreuis interrogé pourquoy vn homme de condition aimoit vn sien seruiteur, & ne connoissoit pas qu'il estoit meschant, & le plus mesdisant homme du monde. Nous ne cognoissons pas respondit-il, les maquemens de ceux que nous aimons, vn seul merite de ce que nous aimós cache mille defauts à nos yeux.

Vn amoureux interrogé pourquoy allant la nuit par la ville il auoit esteint son flambeau au rencôtre de sa maistresse. Il ne faut point

de flambeau, respondit-il, où le Soleil luit.

Les amis d'un habitant de Corasan le venant visiter pour le consoler de la mort de sa femme, qui estoit sage & vertueuse Dame, un d'entr'eux s'enquerant de l'estat de sa santé en telle affliction. Je suis, respondit-il, tout consolé de la mort de ma femme, puisque Dieu l'a ainsi ordonné, mais ce qui m'afflige, c'est la veuë de ma belle mere, qui repete le mariage de sa fille. La roze s'en est allée & l'espine est demeuree: ie supporterois plus patiemment la mort de mille femmes, que la veuë de cette vieille.

Vn Roy Arabe ayant appris qu'un docte & eloquent personnage estoit deuenu insensé à cause de l'amour de Lily, commanda de le faire venir en sa présence, & luy de-

manda pourquoy il viuoit comme les animaux priuez de toute humanité: Mes amis m'ont affligé, répondit-il, en me parlant de l'amour de Lily; pleust à Dieu que ceux qui me blasment eussent veu la personne que j'aime, ils connoistroient leurs ignorances. Cette réponse fit naître au Roy le desir de voir Lily, la voyant noire, laide, & denuée de toute sorte de bonnes graces n'en fit aucune estime. Grand Prince, dist alors cet amoureux, si tu veux reconnoître la beauté de Lily, il faut que tu la regarde avec mes yeux, tu n'auras pitié de mon affliction puisque tu n'as iamais esté affligé: Ceux qui sont sains ne ressentent la douleur des playes d'autrui; reprendre & blâmer l'amour, c'est froter vne playe & mettre du sel dessus.

De l'infirmité de la vieillesse.

CHAPITRE VI.

VN vieillard grandemét malade, interrogés'il auroit agreable qu'on fit appeller vn Medecin. Les medecins , respondit-il, n'ont point de remede contre la vieillesse.

Rostem interrogé pourquoy son fils le traittoit mal en la vieillesse : Il ne se souvient pas , respondit-il, du soin que i'ay eu de luy en sa ieunesse.

Vn vieillard amoureux d'une ieune fille employoit tous ses sens à luy complaire pour luy faire passer le temps & la desennuyer. Vn iour lui remontrant quelle estoit heureuse

d'estre aimée d'un vieillard sage & prudent qui auoit l'experience de plusieurs choses, qui sçauoit que c'estoit que d'aimer, fidelle, doux & paisible, quelle lui deuoit estre plustost fauorable, qu'à un ieune estourdy sans experience, leger & changeant en son amitié, & irresolu en ses deliberations. I'aime mieux, respondit-elle, auoir vne flèche dans le sein, que despouser un vieillard, i'aime mieux aller en Enfer avec un ieune, qu'en Paradis avec toy.

Un vieillard se pleignant un iour à un sien voisin du mauuais traitement qu'il receuoit de son fils qu'il auoit elleué si soigneusement. Pourquoi, lui dit son voisin, desire tu que ton fils te soit obeissant puisque tu as si mal traité ton pere.

Un vieillard ayant un sien fils

grandement malade fut conuié par les amis de prier les Religieux de la ville de se mettre en oraison pour sa santé, ou bien de faire quelque aumosne aux pauvres mandians & personnes necessiteuse de sa cónoissance. Il choisira plustost, dit alors vn Dreuis qui estoit present, les prieres des Religieux que les aumosnes, les aumônes lui cousteroient de l'argent, & il ne donnera rien aux Religieux. Si l'asne d'un vieillard tomboit dans vn borbier, il diroit plustost cent oraisons que de donner vn sol pour l'en faire tirer.

De la

De la nourriture des enfans.

CHAPITRE VII.

VN Seigneur de condition auoit vn fils assez lourdaut, qu'il donna à vn Precepteur pour l'instruire: ce Precepteur l'ayant enseigné long-temps sans fruct, le ramena à son pere, disant qu'il deuient plustost fol, que de rien faire apprendre à son fils: on ne peut rendre bon ce qui est mauuais de nature: vn diamant faux ne fera iamais bon. Si on meine vn asne en Ierusalem & à la Meque, il retournera tousiours asne sans gagner les pardons.

Vn homme sage & vertueux ayant vn fils assez libertin, & adon-

K

né au vice, vint à mourir de mort subite, sans mettre ordre à ses affaires. Le Roy fit saisir tout son bien sans auoir égard à son fils, lequel supplia le Roy de luy restituer la succession de son pere, allez, dit le Roy, apprendre sa vertu & puis vous serez son heritier.

Vn Docteur ayant sous sa charge le fils d'un Prince pour l'instruire, le traittoit si rudement qu'il fut contrainct de se plaindre à son pere, du mauuais traitement de son Precepteur. Ce Prince irrité contre ce Docteur le fit appeller, & luy demanda pourquoy il traittoit son fils plus rudement que les autres disciples. Grand Prince, respondit-il, il faut auoir plus de soin des Grands que des petits, personne ne se soucie des actions des pauures, & tout le monde prend

garde aux actions des Grands. Si vn pauvre à dix mille imperfections, on n'en connoist pas de cent vne, & si vn Prince dict quelque chose mal à propos, tout le monde le sçait. Vn arbre vert se plie facilement, lors qu'il est sec il n'est bon qu'à mettre au feu: la rigueur d'un Precepteur est quelquefois plus vtile aux enfans que l'amitié des parens.

Vn Docteur commis par le Roy au gouuernement de son fils pour l'instruire comme ses propres enfans, employa en vain son soin pour rendre ce Prince capable des sciences & arts liberaux, neantmoins ses enfans s'estoient rendus doctes & eloquents par ses instructions & documents: ce qu'estant venu à la notice du Roy il fit appeller ce Docteur, auquel il fit reproche de n'auoir eu soin de

l'instruction de son fils. Grand Prince, dist le Precepteur, ie l'ay enseigné comme mes propres enfans, mais il n'a rien compris, l'or sort de la terre, mais toute sorte de terre ne produit pas l'or.

*Dispute de Sadi & d'un Dreuis, de la
richesse & de la pauvrete.*

I'Ay veu vn homme vestu en pauvre Religieux Dreuis assis en vne compagnie, lequel apres plusieurs discours faisoit des plaintes de la sorte. Nous sommes en miserable siecle, les mains des pauvres sont liees & sans pouuoir, & les pieds des riches font ce que bon leur semblent les pauvres sont sans argent, & les riches sans courtoisie. Ce discours me desplût par ce que i'ay esté

nourry & esleué par les bien-faits des Grands, ie lui parlay en cetté façon. Mon ami, les riches sont les magasins des pauvres : Le soustien des miserables, le refuge des pelearins, & le support des estrangers, ils ont soin de faire apprester à dîner aux autres; les vefues, les vieillards, leurs parens, & leur voisins se reseruent de leurs bien-faits, ils font quantité de sacrifices & d'aumosnes. Quand arriuera-tu à tel merite, si tu ne peuz dire vne oraison sans auoir l'esprit diuertie par mille pensees, il est necessaire que les Grands entretiennent l'honnesteté dans le monde : L'esprit tranquille & obeissant ne se retreuve en la necessité, quelle refection peut-on prendre en vne table vuide? Quelle courtoisie peut-on esperer d'une main necessiteuse,

celui qui a les pieds liez ne se peut pourmener, quelle aumône peut faire celui qui meurt de faim? Ceux qui ne peuvent supporter l'esclat du Soleil doiuent cheminer la nuict; La formis traueille l'esté pour se reposer l'hyuer; Le pauvre n'est iamais en repos, il songe en priant Dieu ce qu'il mangera à son repas cependât que les riches sont attentifs à leur prieres. Lors le Dreuis lui replicqua, As-tu ouy ce que dit nostre Prophe-te, Ma gloire est en la pauvreté: Tais-toy, replicquay-je, Le Prophe-te entend parler de ceux qui sont volontairement pauvres pour l'amour de Dieu, ceux-là ne sont iamais pauvres, ils sont tousiours riches, & vivent sans necessité: quelle prouision feras-tu pour l'aduenir sans argent, le peuple aime le bien: vn homme

necessiteux est facilement esbranlé en sa religion. Ceux qui n'ont point d'habits ne se peuuent vestir, & qui n'a point d'argent n'a point de vestement; quand arriueras-tu à la perfection des Prophetes, il n'y a point de pauures en Paradis, chacun y est riche. Celui qui a ressenti l'extremité de la faim & de la soif, deuient auaritieux pour se garantir à l'aduenir de cette misere: la necessité luy faict oublier ce qui est licite, & luy faict enfreindre ce qui est defendu: le riche ne prend que ce qui luy appartient, rien ne l'oblige de prendre ce qui est à son prochain. Ce discours le mit en cholere, & animé contre moy, il parla en cette façon. Tu as amplement loué les riches, il est vray qu'ils ont le theriaque contre la pauureté, & les clefs des Thresors, mais

ils sont superbes & glorieux, & avaricieux, ils corrompent les dignitez par leurs richesses, parlent souuent sans iugement, regardent vn chacun avec mespris, ils se moquent des Docteurs qui sont pauures, & prennent la pauureté pour vne infamie, ils se preferent à tout le monde, & pretendent le haut-bout en toute sorte de compagnie. Ceux qui sont riches en biens sont souuent pauures en sçauoir: le riche sans merite qui veut prendre de l'aduantage sur le docte est semblable à vn asne parfumé d'ambre gris. Les riches, luy dy-ie, sont courtois & secourables: Tu te trompe, respondit-il, ils sont esclaués de l'argent, quel profit rapporte la nuée sans pluye? A quoy nous seruiroit le Soleil s'il ne luiloit iamais? Ils ne feroient pas vn pas pour l'amour de

Dieu, ils ne prestant point d'argent sans interest, ils ne font courtoisie qu'à dessein de nous perdre, & n'ont autre soin que d'accumuler des biens : les thresors des auaritieux ne sont vtils au peuple qu'apres leur deceds, leurs heritiers depensent bié souuent follement ce que leurs peres ont acquis iniustement. Si on va chez eux pour les prier de quelque courtoisie, ils commandent à leurs portiers de dire qu'il n'y a personne au logis, & à la verité ils ont raison, lors qu'il n'y a au logis que des ignorants & des inciuils, on fait bien de dire qu'il n'y a personne. Ils sont contraincts, repliquay-ie, de faire de la façon pour se deliurer de l'importunité des gueux, si tout le sable de la mer estoit perles d'Orient, les yeux des gueux ne seroient pas contents.

Tout le mode ne peut contenter celui qui est auide de biens, la pauvre-ténous conduit aux prisons, nous lie les mains, & la necessité fait sortir le Lyon de sa caverne pour rôber dans les embusches des chasseurs, elle entre iusques dans les deserts & dans les lieux solitaires pour faire enfreindre les vœux aux Religieux. Le Corbeau qui a bien faim & rencôtre vne charongne, ne s'informe pas si c'est l'asne d'un Prophete ou le Chameau de l'Antechrist, la necessité nous contrainct à faire des choses honteuses. Apres plusieurs semblables discours, il s'abandonna à la cholere, & me chanta milles iniures à la façon des ignorants, il me saisit au collet, ieluy empoignay la barbe, & tombasmes l'un sur l'autre en nous colletant, cependant que le

peuple serioit de nous, estans separez nous allasmes ensemble faire nos plaintes au Iuge du lieu, lequel ayant ouy le subiect de nostre querelle demeura tout confus, & apres auoir demeuré pēsif quelque temps il haussa la teste, parlant en ceste façon. Toy qui as loüé si hautement les riches, & mes-estimé les pauures, sçache que l'espine se treuue aupres de la roze: L'yurongnerie aux cabarets, les couleuures & les serpents aupres des thresors, & les Baleines qui engloutissent les personnes aux lieux où l'on pesche les perles, ne prends pas garde aux mauuaises herbes qui sont dans vn iardin ny arbres secs qui sont dans vn verger. Il se treuue des bons & des meschâts parmy les riches, il y en a qui loüent Dieu de de ses graces, & autres qui

ne le loüent pas , entre les pauvres il y en a qui prennent patience en Dieu, & d'autres qui ne la prennent pas. Dieu aime les riches qui vivent en pauvres, & les pauvres qui vivent en riches, & se contentent de ce que Dieu leur a donné. Et tournant les yeux du costé du pauvre Religieux Dreuï, il cōtinua de cette façon; Tu blasmes les riches , tu les accuse de débauche, d'insolence & d'yvrognerie, sçache que telles gens se rencōtrent dans le monde , ainsi que tu dis, qui n'ont autre soin que de leurs plaisirs, & d'amasser des biens avec vne auidité insatiable, ils y mettent leur appuy, & ne se soucient pas du malheur de leur prochain, mais il y en a aussi d'autres qui vivent honorablement , qui sont humbles & courtois à vn chacun, & qui se plai-

sent à soulager les pauvres, ceux-là sont heureux en ce mode & en l'autre. Le discours du Juge nous contenta tous deux, & par son ordonnance nous nous embrassâmes, avec protestation d'oublier nostre aigreur passée, & mis fin à nostre altercation, avec ces mots, *Que les Religieux ne se fâchent pas d'estre pauvres, s'ils meurent en la pauvreté, ils ont acquis le but de leurs intentions aussi bien que les riches.*

Des Prouerbes.

CHAP. VIII.

Les biens sont pour ayder à sub-
stenter la vie, & la vie nous
est pas donnée pour acquérir des
biens.

Celui est heureux qui s'est serui de
ses biens pendant sa vie, & celui
malheureux qui a acquis quantité
de biens & est mort sans s'en seruir.

Trauaille & ne t'oblige à person-
ne, le profit t'en arriuera, si tu se-
coüe vn arbre les fruiçts meurs tom-
beront, & tu en mangeras.

Ne crois obliger vn Roy en le ser-
uant, il croid t'obliger de t'em-
ployer à son seruice.

Deux sortes de gens sont priuez de iugement, celui qui a du bien & n'en ioüit pas pour l'espargner, & celui qui a de la science & ne fait rien de bien.

Celui qui se glorifie de sa science, est semblable à celui qui a recueilly vne grande moisson & a mit le feu dedans.

Les Rois qui sont bien conßeillez n'employent que des personnes sages & doctes, & les personnes sages & doctes ne s'employent au service des Rois.

Trois choses ne peuuent subſiſter l'vne ſans l'autre, la marchandife ſans argent, la diſpute ſans Docteur, & le Roy ſans chaſtiment.

Fauoriſer les meſchans, eſt choſe iniuſte, & les meſchands eſtiment

iniustice de fauoriser les bons.

Ne te fie en l'amitié des Rois, n'assure l'armonie de ta musique sur la voix des ieunes enfans, & ne te glorifie de la vertu de ta femme, ce sont trois choses semblables au songe, & subiettes au changement.

Ne dy ton secret à ton amy, & pense qu'il peut estre vn iour ton ennemy.

Ne procure à ton ennemy tous les desplaisirs qui sont en ton pouuoir, & pense qu'il peut estre vn iour ton amy.

Il est meilleur de te taire que de dire ton secret à autruy, & le prier de n'en dire mot, personne ne sera plus affectionné à te complaire que toy mesme.

Ne dis en particulier ce qu'on a honte de dire en public.

Celuy qui

Celui qui mesprise vn petit ennemy est semblable à celui qui mesprise vn petit feu dans son pailler qu'il faut esteindre promptement, de peur qu'il n'embraze tout le logis.

Parle avec deux ennemis en telle façon que tu ne sois honteux auprès d'eux, s'ils viennent à estre amis.

Il n'est bon d'hazarder sa personne en ce qui se peut faire par argent.

Ne sois cholere outre mesure, ne sois doux à contre-temps, ne souleue personne de tes bien-faits, & ne priue personne d'esperance par ta rigueur.

Il faut estre doux & rigoureux, comme celuy qui tient la lancette pour tirer du sang, il faict la playe & la guerit.

Ne fais autrui si puissant qu'il te puisse nuire.

L

Deux personnes sont ennemis de la Royauté, & de la Religion; vn Roy sans clemence & vn Religieux sans science.

Ne te glorifie de ton sçauoir, personne ne le croit ignorât, & chacun treuve son enfant beau.

Celuy ne merite d'estre secouru en son aduersité, qui n'a fait des amis en sa prosperité.

Sois muet avec les ignorants, que si l'ignorant cognoissoit son ignorance, il ne seroit plus ignorant.

On ne peut rien apprendre d'un ignorant, & l'ignorant peut apprendre des bestes à se taire.

Celuy qui a acquis de la science, & n'en profite au public, est semblable à celuy qui a labouré son champ & n'y a rien semé.

Ne découure les manquements de

ton amy tu le rendras honteux , & perdras la confiance qu'il a en toy si tu declares des faux.

Net'assure en la recompense des grands en les seruant , le Lyon deuore quelquefois celuy qui le nourrit.

Ne t'esmerueille pas si l'ignorant semble quelquefois auoir de l'aduantage sur le docte, avec lequel il conuerse. Vn rossignol mis dans vne cage avec vn corbeau , luy cederà & ne chantera pas.

Le sage parle peu, & le fol est semblable à vn tambour qui meine force bruit , par ce qu'il est vuide dedans.

Vn docte entre les ignorants est comme vn beau tableau parmy les aueugles.

Plus on s'humilie à vn ignorant,

L ij

& plus il se confirme en son ignorance.

Ne preste ton argent à gens sans religion. Celuy n'aura soin de payer ce qu'il te doit, qui ne se soucie de rendre graces à Dieu de ses bien-faits.

Vn voyageur sans science est vn oiseau sans ailles, & vn Predicateur sans eloquence est vn arbre sans fruct.

Vn homme interrogé pourquoy il mettoit plustost les bagues & anneaux de pierrerie en la main gauche qu'à la droite qui luy est preferable, ne sçay tu pas, respondit-il, que chacun n'a pas ce qu'il merite.

Vn grand Seigneur interrogé pourquoy il mettoit ses bagues & anneaux à la main gauche, afin respondit-il, que la main droite les defende.

Chacun public les manquements
d'un auaricieux, & cache les defauts
de celuy qui est liberal.

Ie y par l'aide de Dieu, Clement
& misericordieux finy le Liure
intitulé Gulistan, fait par Sadi hom-
me facetieux & graue en son dis-
cours, pour recreer le Lecteur en la
lecture de ce Liure, melle de bons
conseils & aduertissements, & au-
quel il a esté d'autant plus exact, que
cen'est le faict d'un homme sage de
humer inutilement la fumée de la
chandelle par le trou de la lanterne.
Celuy qui appliquera son esprit à le
lire, il y treuerra la lumiere entiere
d'une bonne conduite, dont il rece-
ura profit & contentement. Que si
personne ne veut receuoir ses instru-
ctions, il se contente que le sçauoir
luy en demeure.

Nous auons donné des aduertif-
sements salutaires à nos compatrio-
tes en quoy nous auons employé
quelque temps s'ils ne sont desireux
de les apprendre le sçauoir en de-
meurera à celuy qui les a enseigné.

FIN.

111th 122nd 10th





